

Repelesin

Jon dai niñil ñu kil tikak

1 ¹Yad Jon, God wög gi ñeb bi ne alap midebin. Minim ñu kil tikebin nib aul, ned misej ma niñlak. Bin bi God nop wög gi ñibal okok, tap tari tari ulep ginigab ak niñlan, agil, God ne Jisas Kraiss nop agek, ne pen ejol ne ak ag yokek apil gek, yad dai niñnek. ²Dai niñnek nibak, God minim ne agak ak abe, Jisas Kraiss minim ne agak ak abe niñnek ak, mij nibaul ñu kil tikebin. ³Ulep mideb, tap tari tari dai niñnek ak magilsek wagin gil gi dam amnigab. Nibak, bin bi minim ñu kil tikebin nib aul kiri ke uđin li niñnigal okok abe, bin bi ognap uđin li niñ agel peyig niñnigal okok abe, God Minim nibaul niñ dil kisen genigal ak, God gek, miñ miñ niñnigal.

Jon bin bi cöc akniß ar oñid midelak okok kirop minim ag ñak

⁴Yad Jon nibep bin bi Esia Propins kariß lim sikol ke ke akniß ar oñid Kraiss cöc ne midebin okok, mij aul ñu kil tikebin.

God ne miñi mideb, birarik ped okok midoligip, kisen per per nep midenigab God nibak, nibep yimig niñil, di tep gil, kod midek, nißi kapkap sain tikil mid tep gi midenimib. God nibak abe, kaun ar oñid sea kiñ bisigep ne ar siñak midebal okok abe, nibep yimig niñil, di tep gil, kod midek, nißi kapkap sain tikil mid tep gi midenimib. ⁵Jisas Kraiss, minim tep ak damil, God agak rek nep gil kimil, wagin gi warikil, kariß lim okok kiñ midebal okok kirop magilsek kod mideb Bi Kib ak, ne ak rek nep nibep yimig niñil, di tep gil, kod midek, nißi kapkap sain tikil mid tep gi midenimib.

Ne cinop midmagil lil, lakañ ne yapek kimil,
tap si tap timel gißin gac ak lig gi yokip.

⁶Cin Kiñ kib Jisas Kraiss kariß ne midil,

Nap God nop sobok gep bin bi ne midobin.

Nib ak, Jisas Kraiss, Bi melik tep sek ak, Bi kilis yib ak,
yib ne ak per nep per nep agon ar amnañ!

Nib aknib rek tep.

⁷ Pen niñim! Ne seb bad sek apek,
 bin bi karip lim okok nib okok nib magilsek nop misen niñnigal.
 Bi nop goliñ di piñ lilak okok abe
 magilsek nop misen niñnigal.
 Nop niñil, bin bi karip lim okok nib okok nib magilsek,
 tari ginig nig gipin, agil, molil gek sil kib agnigal.
 Niñid, nig ginigab me ak!
 Nib aknib rek tep.

⁸ God Bi Kib kilis ke sek tap okok magilsek ginimiñ rek nep mideb ak, ne miñi mideb, birarik ped okok midoligip, kisen per nep per nep midenigab. Ne agip, “Yad nep gen, tap okok magilsek wagin gil mideb. Yad nep gen, tap okok magilsek kir ginig ginigab,” agip.

Jon dai niñil Jisas nop niñak

⁹Yad namam nibi Jon, Kiñ cin Jisas karip ne midil, nop wög gi ñon, bin bi okok cinop gi timel gel, gos par ma niñil, gos sek midil, nop ma kirig gil, kilis yib gil gon ameb. Yad God Minim ak ag ñil, Jisas apil minim tep cinop ag misen lak minim niñid nibak ag ñen, yip miñ lil, dam ñig solwara tib kis gak airan Patmos siñak lilak.

¹⁰Airan Patmos siñak miden, Bi Kib ñin ne alap, God Kaun ak yip bak lek niñlig gi, kid yad okok ar minim kib alap, akil magil rek agil agak,
¹¹ “Nak tap tari tari niñnigaban okok, mij ñu kil tikil, bin bi taun kib ke ke aknib ar oñid Kraiss cöc ne midebal okok, kirop mij nibak yokek amnañ. Epesas alap, Simöna alap, Pegamam alap, Taiataira alap, Sadis alap, Piladelpia alap, Leodisia alap yokek amnañ,” agak.

¹²Minim nib agek niñlig gi, yad bi minim ageb nibak niñin, agil, adik gil niñnek, lam kab gol dil gilak aknib ar oñid siñak midek. ¹³Pen lam nab nib siñak, yad niñnek, bi ñi rek bi alap midek. Ne waliñ par kib yib alap yimek tob gol ne karikak; kab gol dil gilak sib nag kib alap di pabil nab siñak alañ pog lak. ¹⁴Nabic cög kimkas ne ak, kaj sipsip kas tid mideb rek, aka seb tid mideb rek, lak. Udin ne ak, mab milañ rek midek. ¹⁵Tob kid ne ak, tap kapa kilis “bras” apal ak dagilel, yin gopen dip rek ak gak. Pen minim ne ak, ñig sij kib piñil gu agip rek ak agak. ¹⁶Ñinmagil yipid kid ne ak, gap aknib ar oñid ak dil midek. Pen tu par kid gol gol gak alap meg migan ar alañ ap ran jakak. Milik jo milik ne ak, pib nab epel apil, melik kid yib agil gip rek gak.

¹⁷Yad nop niñil, tob wagin ne siñak ap yap gon yimil, bin bi kimbal kalau gip ak rek midenek. Nig gen, ñin yipid kid pis ne ak yip di niñil agak, “Ma piriknimin! Yad ke gen, tap okok magilsek wagin gil mideb. Yad ke gen, tap okok magilsek kir ginig ginigab. ¹⁸Yad me Bi Per Komiñ Mideb ak. Ned kimnek ak pen niñan! Miñi komiñ midil, per nep per nep

komiŋ midenigain. Yad ‘Kimeb Won’ ak kod midebin. Bin bi kimil, am ‘Çip Kaunan Karip’ midebal okok, yad piyam ur ak di midil, ‘Çip Kaunan Karip’ kau ak abe, bin bi ‘Çip Kaunan Karip’ siŋak midebal okok abe, kod midebin. Yad kiŋoŋ yikenigain kiri ak rek nep komiŋ amnigal.

¹⁹“Niŋ ak, tap tari tari niŋan ak miŋ ñu kil tiknimin. Miñi geb rek niŋil, kisen ginigab rek niŋil, magilsek mij eyaŋ ñu kil tiknimin. ²⁰Pen tap niŋesan okok, minim waŋin ak niŋ gil mideb: lam gol dil gilak akniŋ ar oŋid niŋesan okok, bin bi karip lim ke ke akniŋ ar oŋid Kraiŋ cöc ne midebal okok niŋesan. Pen gap akniŋ ar oŋid ñinmagil yipid piŋ kid yad ar ak niŋesan okok, ejol cöc akniŋ ar oŋid kod midebal okok niŋesan,” agak.

Krais bin bi ne Epesas mideligipal minim ag ñeb

2 ¹“Pen taun kib Epesas Kraiŋ bin bi ne midebal okok, ejol kirop kod mideb ak nop minim ñu kil tikil agnimin:

‘Bi gap akniŋ ar oŋid ñinmagil yipid piŋ kid ne ar ak dilig gi, lam gol dil gilak akniŋ ar oŋid nab siŋak ajeb ak, Epesas bin bi kod mideban okok kirop minim nibaul ag yokip.

²Ne agip,

“Nag ar nibi gipim ak yad bir niŋin. Nibi wög kilis gil gi damil koslam midil, ma yo niŋim ak, niŋin. Bin bi gi timel gipal okok kirop niŋem, nibep tep ma gip. Bi Jisas minim dad ameb midobin, agil, minim esek apal okok kirop niŋ tep gil, asik mosik gipim. ³Yip niŋ dil minim yad agem nibep miker ñel, ma yo niŋil, yip eip cig gilig gi nep midebim ak, yip tep gip.

⁴“Pen yad minim alap mideb. Yad eip ned cig gil midmagil yib lil midöligipim miñ ar ak dam yokpim akal? ⁵Ned yip midmagil lilig gi, gi tep göligipim miñ tep nibak, tari ginig kirig gipin agil kauyaŋ dil, ned mid tep göligipim rek midenimib. Mer ak, yad apil lam nibep ak di piŋi gi dinigain.

⁶“Pen ar alap gipim ak, yip tep gip. Bin bi kiri bi Nikolas minim tom ne ak dil, nag timel ar ak gel yip tep ma gip rek, nibep ak rek nep tep ma gip.

⁷“Niŋi bin bi gos timid midonimiŋ okok, God Kaun ne Kraiŋ bin bi ne midebal karip lim ke ke okok kirop minim ageb ak niŋ tep ginimib.

Bin bi miker apek, gos par ma niŋil, yip cig gilig gi nep midenigal okok, ñin kisen onigab ak kirop agen, per komiŋ midep mab magil God wög dai tep ne ar alaŋ tanib ak dil ñiŋnigal,” agip, agnimin.

Krais bin bi ne Simöna mideligipal minim ag ñeb

⁸“Pen taun kib Simöna Kraiŋ bin bi ne midebal okok, ejol kirop kod mideb ak nop minim ñu kil tikil agnimin:

'Bi ne gek, tap okok magilsek wagin gil mideb ak; Bi ne gek, tap okok magilsek kir ginig ginigab ak; Bi kimil kauyaŋ warikak ak, Simöna bin bi kod mideban okok kirop minim nibaul ag yokip.

⁹Ne agip,

"Yad nipin, bin bi ognap, cin God bin bi yipid gil midobin apal ak pen Seten sobok gep karip ne midil, nibep minim dilig gi midebal. Miker nibi tari tari mideb okok, yad ak rek nep nipin. Nibi bin bi yim gep rek midebim ak pen yad nipin God udin yirik ar ne ak nibi bin bi gep yib midebim. ¹⁰Nibep miker ginig geb ak, gos kib ma niŋnimib. Niŋim! Ulep mideb, Kraiss nop cig tep gipal aka ap yap paknigal, agil, Seten gek, nibep ognap di miñ linigal. Nibep ñin akniŋ wajrem alaŋ ak rek gi timel gilig gi midenigal. Pen nibep tari tari gil, pis nep ñag pak linig genigal ak, gos par nibak ma niŋnimib. Yip cig gilig gi nep midem ñag pak lenigal ak, nibep per komiŋ midep usajil bad ak ñinigain.

¹¹Nibi bin bi gos timid midonimiŋ okok, God Kaun ne Kraiss bin bi ne midebal karip lim ke ke okok kirop minim ageb ak niŋ tep ginimib.

Seten nibep neb neb ginigab ak pen bin bi yip cig gilig gi nep midenigal okok, yur kib dil kimbak rek ak kauyaŋ ma kimnigal," agip,' agninin.

Kraiss bin bi ne Pegamam mideligipal minim ag ñeb

¹²"Pen taun kib Pegamam Kraiss bin bi ne midebal okok, ejol kirop kod mideb ak nop minim ñu kil tikil agninin:

'Bi tu par kid ne gol gol kid mideb ak, Pegamam bin bi kod mideban okok kirop minim nibaul ag yokip.

¹³Ne agip,

"Yad nipin, nibi koslam yib midebim. Bin bi karip lim nibi midebim nab siŋak, Seten kiŋ rek kod mideb. Pen nibi minim yip ak niŋ di tep gil, yip cig gi tep gilig gi midebim. Karip lim Seten kod mideb nibak, namam Adipas minim tep yad ak bin bi okok kirop ag ñi midek, nop ñag pak lilak ak pen yip ma kirig gipek.

¹⁴Pen minim ognap mideb. Bin bi nibi ognap, Belam minim ag ñoligip rek ag ñibal. Bi Belam nibak, Belak nop timid ukek me, Belak ne am Isrel bin bi okok kirop lip gi dad amek, kiri yip kirig gil, tap ñiŋeb tap yokop god esek okok nop pak sobok gi ñoligipal ak ñiböligipal. Belak Isrel bin bi kirop agek, kiri bin si bi si göligipal.

¹⁵Isrel bin bi birariŋ okok göligipal rek, nibi ognap bi Nikolas minim esek ne ak dil, nag timel ar ne ak kisen gil gem ameb. ¹⁶Nib ak, tap si tap timel gipim ak, tari ginig niŋ gipin agil, kirig ginimib. Pen niŋ ma ginigabim ak, yad ulep kasek apil, tu par kid meg miŋan yad eyaŋ nib apjakeb ak dil, bin bi niŋ gipal okok eip pen pen ginigain.

¹⁷Nibi bin bi gos timid midonimiņ okok, God Kaun ne Kraiss bin bi ne midebal kariņ lim ke ke okok kirop minim ageb ak niņ tep ginimib.

Seten nibep neb neb ginigab ak pen bin bi yip cig gilig gi nep mideniņal okok, yad tap niņeb mana we gilak ak ognap nen niņniņal. Pen kirop kab tid ke ke niņigain. Kab niņigain ar nib okok, yib kisen nib ak tik ke ke nokim nokim niņigain, bin bi diņigal okok nep niņniņal,” agiņ, agniņin.

Krais bin bi ne Taiataira mideligipal minim ag niņ

¹⁸“Pen taun kib Taiataira Kraiss bin bi ne midebal okok, ejol kirop kod mideb ak nop minim nu kil tikil agniņin:

‘God Ni ne, uđin mab miļan rek midek niņlig gi, tob kid ne ak, kapa bras apal ak dagilel yin gopen tik diņ rek mideb ak, Taiataira bin bi kod mideban okok kirop minim nibaul ag yokiņ.

¹⁹Ne agiņ,

“Nag ar nibi giņim ak yad bir niņin. Yip abe, bin bi okok kirop abe midmagil lil, kilis gil yip wog gilig gi nep midebiņ ak, yad niņin. Ai mam okok pen pen di tep gil, gi niļ, miķer apek koslam midil gos par ma niņim ak, yad niņin. Giņim niņak, ned sikol sikol goliņiņim ak pen miņi tapin giņim ak, yad niņin.

²⁰Pen minim alap mideb. Bin Jesebel ak ma ag yokiņim. Minim esek agil, yad God minim agep bin alap midebin agiņ. Bin bi yip niņ diņal okok kirop minim esek ag niļ, lip gi dad amek, kiri yip kirig gil, bin si bi si giņal. Ne kirop agek, tap niņeb tap yokop god esek okok nop pak sobok gi niņal ak niņal. ²¹Ne nag timel ar niņak kirig gil mid tep ginimiņ aka agil, niņ mid mer niņil kirig giņin. ²²Nig giņ rek yad nop aban ar siņak yoken, nop miņak kib gek, yur kib yib diņigab. Bin bi ne eip bin si bi si giņal nib okok, tap si tap timel giņal ak, tari ginig nig giņin agil, ma kirig ginigal ak, kirop ak rek nep gen, miņak kib gek, yur kib yib diņigal. ²³Bin bi nop kisen giņal okok kirop pis nep niņ pak lenigain me, bin bi yad kariņ lim ke ke cōc ke ke midebal okok, yip niņ tep gil niņniņal, yad bin bi gos timid nab nibep eyaņ niņ tep gil, magilsek giņim giņim rek niņil, nibep nokim nokim pen niņak rek niņigain. ²⁴Pen nibi Taiataira bin bi ognap, bin niņak minim timel ag niņ minim ak ma diļ, Seten minim timel yipil apal minim ak ma diņim rek, minim miķer ognap sek nibep ma agniņain. ²⁵Pen yip niņ diļ cig tep giņim nag ar ak di cici lil midem midem, kisen yad niņigain!

²⁶Bin bi yip cig tep gilig gi nep mid damil, miķer apek yip ma kirig ginigal okok, yad kirop agen, bin bi kariņ lim ke ke okok kirop kod mideniņal. ²⁷Tari ginig: Bapi minim alap yip agil agak,

‘Yad agen, ne ain yir alap dil,
 tin cög okok pak jisipik masipik gipal rek,
 bin bi karip lim ke ke okok
 kilis timel yib gil kirop kod midenigab,’ agak.

²⁸Pen bin bi yip niñ dil cig tep gil nag tep ar ak di cici gilig gi midenigal okok, kirop gap poglin tep karip lim jin parikek niñlig gi nipal rek ak ñinigain.

²⁹Nibi bin bi gos timid midonimiñ okok, God Kaun ne Kraiss bin bi ne midebal karip lim ke ke okok kirop minim ageb ak niñ tep ginimib,” agip,’ agnimin,” agak.

Kraiss bin bi ne Sadis mideligipal minim ag ñeb

3 ¹“Pen taun kib Sadis Kraiss bin bi ne midebal okok, ejol kirop kod mideb ak nop minim ñu kil tikil agnimin:

‘Bi God Kaun tam pak akniñ ar oñid lip ak abe, gap akniñ ar oñid ak abe di mideb ak, Sadis bin bi kod mideban okok kirop minim nibaul ag yokip.

Ne agip,

“Nag ar nibi gipim ak yad bir nipin. Bin bi okok niñel, komiñ midil yip kisen gipim rek lip pen pis nep kimil yip kisen ma gipim.

²God yad minim ageb rek gi damil, nab siñak kirig gipim ak, God nop tep ma gip. Nibak, uñin nibi mimiñ midib ak rek, warikil, komiñ won nibi kir ginig geb ak niñ tep gem, kilis ginimiñ. ³Nib ak, Kraiss minim tep ak ag ñelak nipim ak, niñ di wös gil, tap si tap timel gipim ak, tari ginig nig gipin agil, kirig gil, Kraiss minim tep ak ageb rek ginimib. Pen wisin saköl kinil ma warikniñgibim ak, yad bi tap si dep bi okok niñ midel ma opal rek ak apen, nibi niñil pak plöplö ginigabim.

⁴Pen nibi Sadis bin bi midebim okok, bin bi ognap waliñ kiri gel acir ma gip; minim tep yad niñ dil, ageb rek nep gilig gi midebal rek, kiri waliñ tid lil, yad eip ajenigal. ⁵Bin bi miker apek, kilis gil, yip niñ di wös gil, cig gilig gi nep midel amniñgib okok, yad kirop ak rek nep waliñ tid tep nibak li ñinigain. Pen yib kiri per midep buk eyañ ñu kil tik len mideb ak, ma lig gi yokniñgain, mer. Bapi abe, ejol ne okok abe niñ midel niñlig gi, bin bi yad midebal, agil, miñeñ agniñgain.

⁶Nibi bin bi gos timid midonimiñ okok, God Kaun ne Kraiss bin bi ne midebal karip lim ke ke okok kirop minim ageb ak niñ tep ginimib,” agip,’ agnimin.”

Kraiss bin bi ne Piladelpia mideligipal minim ag ñeb

⁷“Pen taun kib Piladelpia Kraiss bin bi ne midebal okok, ejol kirop kod mideb ak nop minim ñu kil tikil agnimin:

‘Bi Siŋ ak; Bi minim niŋid yib ageb ak; kiŋ Depid ki ur ne ned kod midoligip ak, Bi ki ur nibak miŋi dil mideb ak, kijoŋ yikek, bin bi ognap gi ŋinimel rek ma lip; pen kijoŋ gi ŋek, bin bi ognap yiknimel rek ma lip. Bi nibak nep, Piladelpia bin bi kod mideban okok kirop minim nibaul ag yokip.

⁸Ne agip,

“Nag ar nibi gipim ak yad bir nipin. Nibi bin bi koŋai ma midebim ak pen minim yip niŋ di wös gil, nibi bin bi yad midebim minim ak misen ag ŋibim. Nibak, nibep kijoŋ yiken, bin bi ognap gi ŋinimel rek ma lip. ⁹Bin bi ognap, cin God bin bi yipid gil midobin apal ak pen Seten sobok gep kariŋ ne midebal. Pen yad kirop gen, kiri magilsek am tob wagin nibep siŋak kogim yimil, kibor kiyan gil, yad nibep midmagil lipin ak niŋnimel. ¹⁰Nibep gi timel gipal ak pen nibi yad apin rek nep gil, gos par ma niŋil, kilis gil, wög yip gilig gi midebim rek, bin bi lim dai ar wagin aul ke ke okok, yip cig gi mideniŋal aka yip kirig ginigal agil, kirop magilsek miker ŋinigain ŋin ak, nibep abe ma ŋinigain.

¹¹Ulep mideb ninigain. Minim tep yad niŋ dipim ak, niŋ di kilis gil, yip cig gilig gi nep midem, per komiŋ midep usajil bad nibep ŋinigain apin ak, bin bi ognap pili gi dad amnimel rek ma linigab.

¹²Bin bi an God Minim ageb rek gek, nop gi timel gel, gos par ma niŋil, God Minim ageb rek nep gi damil, yip cig gilig gi nep mideniŋab ak, yad nop gen, God yad sobok gep kariŋ ak sap kib alap rek mideniŋab. God sobok gep kariŋ nibak ne per per nep migan nab adaŋ midil, mis ken ma amniŋab. Yad wak ar nop, God yad yib ne ak abe ŋu kil tikil, God yad taun kib ne Jerusalem kisen nib seb kab ar alaŋ siŋak nib onigab ak, taun kib nibak yib ak abe ŋu kil tikil, yib yad kisen nib ak abe ŋu kil tikil ginigain.

¹³Nibi bin bi gos timid midonimiŋ okok, God Kaun ne Krais bin bi ne midebal kariŋ lim ke ke okok kirop minim ageb ak niŋ tep ginimib,” agip, agnimin.

Krais bin bi ne Leodisia mideliŋipal minim ag ŋeb

¹⁴“Pen taun kib Leodisia Krais bin bi ne midebal okok, ejol kirop kod mideb ak nop minim ŋu kil tikil agnimin:

‘Bi yib ne “Niŋ Akniŋ Rek Ginimiŋ” ak; Bi, God ne agek, tap okok magilsek gi lak ak; Bi ne God ageb rek nep gil, minim tep ak dam yipid gil nep ag ŋib ak, Leodisia bin bi kod mideban okok kirop minim nibaul ag yokip.

¹⁵⁻¹⁶Ne agip,

“Nag ar nibi gipim ak yad bir nipin. Yip piŋ nep ma cig gipim; yip piŋ nep ma kirig gipim. Minim tep yad ak piŋ nep niŋ dil, ageb rek

ginimib aka pis nep kirig ginimib ak tep! Yip gos ar ar nep nipim rek, nibep wök yoknig gebin. ¹⁷Nibi apim, ‘Cin bin bi gep mid tep gipin; tap cin koñai mideb; tap alap ulep ma gip,’ apim ak pen minim ma nipim ak, nibi bin bi tam okok rek midebim; nibi bin bi yim gep rek midebim; nibi bin bi tap ma mideb rek midebim; nibi bin bi udin kwoi midebim; nibi magil nep midebim. ¹⁸Nib ak me, nibep minim agnig gebin aul niñ tep gil, nib aknib rek nep ginimib. Bin bi yim gep rek midebim rek, yip apil kab gol yad dagilen yinil dai dai sek ma mideb ak tauil me, bin bi gep midenigabim. Magil nep midebim ak, bin bi niñel nabiñ ginimij rek lip rek, yip apil walij tid alap tauil lim. Udin ma nipim rek, yip apil udin marasin alap tauil lil, udin kwoi gip ak ñil niñnigabim.

¹⁹Bin bi kirop midmagil lipin okok gi timel genigal ak, yad kirop ma kirig ginigain; mid tep gilanj, agil, miker ñilig gi timid ukpin. Nib ak, gos kilis niñil, tap si tap timel gipim ak, tari ginig nig gipin agil, pis nep kirig gil, mid tep ginimib. ²⁰Niñim! Yad apil, sönj ar eyañ midlig gi, kijonj pak gu gu gilig gi kod midebin. Bin bi an minim yad ak niñil kijonj yikenigab ak, yad karip ñilik migan ne ak amil, eip tap ñibil jim ñil midonigabir.

²¹Seten yip miker kib ñak ñin ak, Bapi yad minim ne ak ma kirig ginek; agak rek nep gi damil me, Bapi eip sea kiñ ne ar ak bisig ginek. Nib ak rek, bin bi Seten kirop miker ñek, minim tep yad ak ma kirig gil, yip cig gilig gi nep midenigal okok, kirop ag dam yad eip sea kiñ yad ar ak bisig ginigabin.

²²Nibi bin bi gos timid midonimij okok, God Kaun ne Kraus bin bi ne midebal karip lim ke ke okok kirop minim ageb ak niñ tep ginimib,” agip,’ agnimin,” agak.

4 ¹Pen minim ñu kil tikesin nibak dai niñ damil, kauyañ ak dai niñil niñnek, God karip lim seb kab ar alañ siñak kijonj yikil midek. Ned akil magil rek agek niñnek ak, kauyañ ak agil yip agak, “Ar aul apek, tap kisen ginigab okok nep yomin,” agak. ²Nib agek niñlig gi, God Kaun ak apil yip goñ lak niñil yad niñnek, seb kab ar alañ siñak bi alap sea kiñ ar siñak bisig midek. ³Bi siñak bisig midek ak melik sek midek; kab jaspera abe kab kanilian abe tid melik gip rek melik sek midek. Pen kiñ sea bisig midek ak, sibeñ nop kis kis gil, kab emral rek yin rikiñ rikiñ gil, yin rik yaplig gi midek. ⁴Sea kiñ ne ak nab eyañ midek niñlig gi, bi kib bisig gipal sea kiñ aknib ñin juil adik gi dam omal omal (24) okok li kis kis gilak. Bi kib minim tig bilokep okok walij tid yimil, kab gol dil gilak usajil bad okok ke ke lil, bisig midelak. ⁵Bi sea kiñ nab eyañ bisig midek siñak nib, añim añim dilig gi, timik aglig gi, kis kis gilig gi amil par sek amnak. Sea kiñ wagin nib siñak sip melik aknib ar onjid ak yinil melik gi midek. Sip melik nib okok me, God Kaun aknib ar onjid ne ak. ⁶Bi sea

kiŋ nab eyaŋ bisig midek wagin siŋak, kab kilmasik ak glas rek kid yib gil midek. Sea kiŋ bak siŋak, tap komiŋ mideb ke ke omal omal mid kis kis gilak. Tap nib okok udin koŋai nep kid okok midil, pabil okok midil gak. ⁷Tap komiŋ nib okok, alap layon rek lak, alap kaj kau anlam rek lak, alap bi milik dai rek lak, alap yakir dik auan par lip ak rek lak. ⁸Pen tap komiŋ omal omal nib okok magilsek auan aknib kagol oŋid lak. Udin koŋai nep, ar okok lil, pabil okok lil magilsek li sakak. Udin auan mok okok abe midek. Pen pib nab kislim eyaŋ, kimep ag midlig gi agebal,
 “NE BI SIŋ “NE BI SIŋ “NE BI SIŋ GOD BI KIB KILIS AKNIB KE YIB NE
 TAP MA GEP ALAP MA MIDEB TARI TARI GINIŋ, GINIŋGAB NE BIRARIK
 PED OKOK MHDOLIGP, NE MŋNI MIDEB, NE KISEN PER PER NEP
 MHDENIGAB” apal.

⁹Pen tap komiŋ ke ke omal omal nib okok, Bi per nep per nep komiŋ midenigab sea kiŋ ar bisig mideb ak, ne Bi tep aknib ke mideb agil, nop tep aglig gi, yib melik sek ne agel ar amek niŋlig gi, ¹⁰bi kib minim tig bilokep nin juil adik gi dam omal omal (24), Bi sea kiŋ bisig mideb wagin siŋak kogim yimil, Bi per nep per nep komiŋ midenigab ak, nop tep aglig gi, yib nop agel ar ameb. Usajil bad kiri okok tig ju ne mideb siŋak lil, agebal,

¹¹ “God Bi Kib cin!

Bin bi magilsek okok,
 nak Bi kib ke yib, agil,
 yib nep agel ar amnaŋ.

Bin bi magilsek okok,
 nak Bi tep ke yib, agil,
 yib nep agel ar amnaŋ.

Bin bi magilsek okok,
 nak Bi kilis ke yib, agil,
 yib nep agel ar amnaŋ.

Nak tap okok magilsek gi linak.

Nak nep agek,
 bin bi midil,
 tap okok magilsek mideb,” agebal.

Jon mij nag non gi kilis gak alap niŋak

5 ¹Pen dai niŋ damil niŋnek, bi sea kiŋ ar ak bisig midek ak, mij par kib dai dai komlak alap ninmagil yipid ne pis ar dil midek. Mij nibak, soŋ ar okok nu kil tikil, miŋan eyaŋ nu kil tikil gilak. Pen dai dai komil, nag ke ke aknib ar oŋid ak non gi tep yib gilak. ²Pen yad niŋnek, God ejol kilis yib alap gaul kib agil agak, “Bin bi an rek nag lilak aul wisibil, mij nib aul tig ju tig pis ginimiŋ rek lip?” agak. ³Nib agak ak pen seb kab ar alaŋ siŋak abe, lim dai ar wagin aul abe, lim mok eyaŋ abe,

bin bi mij nibak nag wisibil tig ju tig pis ginimiņ rek alap ma midek.
 4Seb kab ar alaņ sijaķ abe, lim dai ar wagin aul abe, lim mok eyaņ abe,
 bin bi mij nibak nag wisibil tig ju tig pis ginimiņ rek lip bi alap ma piyo
 niņlak rek, yad yimig yib gek sil aglig gi midenek. 5Pen bi kib minim
 tig bilokep midelak okok alap yip agak, “Nak sil ma ginimin. Niņan!
 Layon Juda nib ak kiņ Depid tikek tik dam dapil gel, nop tik dolak. Ne
 kaual maual ne ak yik gi yokak ak me, mij nibak nag wisibil tig ju tig pis
 ginimiņ rek lip,” agak.

Jon Sipsip Ñilik ak niņak

6Nib agek niņlig gi niņnek, Sipsip Ñilik ñag pak lel kimil warikak rek
 alap, sea kiņ nab sijaķ midek. Tap komiņ mideb ke ke omal omal abe,
 bi kib minim tig bilokep okok abe, mid kis kis gilak. Sipsip Ñilik nibak
 kom akniķ ar oņid ak, uđin akniķ ar oņid ak lak. Uđin akniķ ar oņid lak
 minim wagin ak, God ne Kaun ne akniķ ar oņid ak ag yokek, karip lim
 okok magilsek kid kid amnak. 7Pen Sipsip Ñilik ak Bi sea kiņ bisig midek
 wagin sijaķ amił, mij ñin yipid ne pis ken ar dil midek ak dak. 8Dek
 niņlig gi, tap komiņ omal omal abe, bi kib minim tig bilokep akniķ ñin
 juil adik gi dam omal omal (24) abe apil, midek sijaķ kogim yimlak. Bi
 kib minim tig bilokep nib okok kiri tap gita rek okok ke ke dil, kiņaņ kab
 gol dil gilak okok ke ke di midelak. Kiņaņ di midelak migan nib okok,
 tap dagilel yin sikim gil ki tep owip ak, ap ran jakil midek. Tap God nop
 dagilel yin ki tep owip nibak, God bin bi ne okok nop sobok gipal ak.
 9Pen kiri kimep kisen nib alap agil aglak,

“Nep ñag pak lel,
 lakañ nak soņ gi yapek,
 bin bi karip lim ke ke midebal rek,
 wagin ke ke midebal rek,
 minim yib ke ke apal rek,
 wak ke ke lip rek,
 nak taunak niņil
 kiri God bin bi ne midebal.

Nib ak me, nak nep mij kom ñon gi tep gak nibak,
 wisib tig ju tig pis gi niņnimin rek mideb.

10 Pen nak ginak ak, kiri kiņ karip rek lil,
 God nop sobok gep bin bi lil, God cin nop wög gi ñibal.
 Kiri kisen nak eip bin bi lim dai ar wagin aul okok,
 kirop magilsek kod mideniğal,” aglak.

Sipsip Ñilik ak yib ne agel ar amnak

11Pen dai niņ damil kauyaņ niņil niņnek, ejol ñin juil ñin juil, tausand
 tausand koņai yib nep minim agelak. Sea kiņ nibak abe, tap komiņ omal

omal okok abe, bi kib minim tig bilokep okok abe, kirop piñil kis kis gi midelak. ¹²Pen meg migan dap ranil kimep aglig gi aglak,

“Sipsip Ñilik ñag pak lilak ak, ne tep yib.

Ne tap okok magilsek gi lak, agil,

yib ne agon ar amnañ.

Ne tap alap ulep ma gip, agil,

yib ne agon ar amnañ.

Ne gos tep ke yib mideb, agil,

yib ne agon ar amnañ.

Ne kilis ke yib mideb, agil,

yib ne agon ar amnañ.

Ne tep ke yib mideb, agil,

yib ne agon ar amnañ.

Ne melik tep ke sek mideb, agil,

yib ne agon ar amnañ.

Ne yib ke sek mideb, agil,

yib ne agon ar amnañ,” aglak.

¹³Pen yad niñnek, tap tari tari God gi lek ake lipal seb kab ar alañ, lim dai ar wagin aul, lim mok epi, ñig solwara nab okok magilsek kimep agil aglak,

“Bi sea kiñ bisig gi mideb ak abe,

Sipsip Ñilik ak abe,

kiri yib ke sek midebir, agil,

yib kirop mal agon ar amnañ.

Kiri tep ke yib midebir, agil,

yib kirop mal agon ar amnañ.

Kiri melik tep ke sek midebir, agil,

yib kirop mal agon ar amnañ.

Kiri kilis ke yib midebir, agil,

yib kirop mal agon ar amnañ,” aglak.

¹⁴Ñib agelak, tap komiñ omal omal aglak, “Ñib akniñ rek tep,” aglak. Ñib agelak, bi kib minim tig bilokep okok kogim yimil, God Sipsip Ñilik kirop mal yib agel ar amnak.

Sipsip Ñilik ak nag akniñ ar oñid ak wisibak

6 ¹Pen niñ miden niñlig gi, Sipsip Ñilik ak, mij kom nag ñon kilis gak di midek ak, nag dai sabdañ ak tig ju wisibek niñlig gi, tap komiñ omal omal, nokim alap minim kib timik agip rek agil agak, “Owan e!” agak. ²Agek niñnek, kaj hos tid alap apjakak. Hos ar nibak bi alap cim dil bisig midek. God gek win ginimiñ rek nep lip rek, God nop usajil bad win gil dipal ak li ñek, kariñ lim seb kab ar alañ kirig gil, bin bi kariñ lim wagin eyañ eip pen pen gil, ñag ju yik yokniñ amnak.

³Pen Sipsip Ñilik ak, nag dai yigwu nab nib ak tig ju wisibek niñlig gi, tap komiñ omal omal, yigwu nab nib ak agak, “Owan e!” agak. ⁴Agek niñnek, kaj hos lakañ yib alap apjakak. Bi alap hos ar nibak bisig midek. God gek bi nibak kilis ne dil, karip lim wagin eyañ amil gek, bin bi karip lim tigoñ tigoñ magilsek kapkap midelak ak kirig gil, pen pen ñag paklig gi gel amnigab. Nibak God nop tu par kib tu kid alap ñak.

⁵Pen Sipsip Ñilik ak, nag dai yigwu nokim nib ak tig ju wisibek niñlig gi, tap komiñ omal omal, yigwu nokim nib ak pen agak, “Owan e!” agak. Agek niñnek, kaj hos mosib alap apjakak. Bi kaj hos ar nibak bisig midek ak, tap magil tap sikel lipal rek sikel alap dil midek. ⁶Minim alap, tap komiñ omal omal midelak nab siñak nib agil, bi kaj hos mosib ar bisig midek ak nop agak, “Yuan kib onigab rek, kab magil kid nokim damil, tap koñai taueligipal rek ma taunigal. Wid magil lita^a nokim alap taunig, mani pe ñin nokim alap dipal rek nep taunimel; pen bali magil lita omal nokim taunig, ak rek nep mani pe ñin nokim alap dipal rek nep taunimel. Pen olip wel ak abe, ñig wain ak abe per taupal rek taunigal!” agak.

⁷Pen Sipsip Ñilik ak, nag dai yigwu par alañ ak tig ju wisibek niñlig gi, tap komiñ omal omal, yigwu par nib ak pen agak, “Owan e!” agak. ⁸Agek niñnek, kaj hos se pakip alap apjakak. Bi kaj hos ar nibak bisig midek ak, yib ne Kimeb; pen bi ne eip kisen apek ak, yib ne Cip Kaunan Karip. God gek me, bi nib omal ar ke ke gel, bin bi karip lim okok koñai nep kimel rek lak. Ognap pen pen ñagil kimnigal, ognap yuan kib apek kimnigal, ognap miñak tap okok gek kimnigal, ognap kain sapeb tap saköl okok su lel kimnigal. Nig gil kim damil me, bin bi lim dai ar wagin aul midebal koñai nep rek kimnigal, pen koñai yib nep midenigal.

⁹Pen Sipsip Ñilik ak, nag dai mamid alañ ak tig ju wisibek niñlig gi, niñnek, God nop tap sobok gep bid mok siñak, bin bi God Minim niñ dil, ma pirikil, bin bi okok kirop ag ñil, Kraiss bin bi ne midobin misen agel, kirop ñag pak lilak kaun kiri okok midelak. ¹⁰Kiri sik kib agil aglak, “God Bi Kib kilis yib, nak Bi Siñ. Nak niñid yib ar ak nep gipan! Pen ñin titi rek midil, bin bi karip lim wagin eyañ, cinop ñag pak lilak okok kirop minim kib agil, yur ñinigan?” aglak. ¹¹Nib agel niñlig gi, ejol okok kirop walij tid par ke ke ñilig gi aglak, “Ulep mideb; kod midenimib. Namam nanai nibep eip God nop wög gi ñibal okok, ognap sek ñag pak lel me, God wök pag lak naba ak amek, agebim rek ginigab,” aglak.

¹²Pen Sipsip Ñilik ak, nag dai kagol oñid ak tig ju wisibek niñlig gi, niñnek, monmon kib yib ak dek niñlig gi, piñ ak, wad ajil mab yinil sigi gip rek ak gek, takin ak piñ nep lakañ mideb rek lakañ yib lak. ¹³Gap okok, yigen kilis dil kiyau magil pok ma gil kisik nep ju yowip rek ak ju yowak. ¹⁴Pen seb kab ar alañ, sinai pag lipal ak rek gak. Karip lim yirik

^a 6:6 Grik minim koiniks agöligipal ak, lita nokim alap nep rek mideb.

okok abe, karip lim ñig tib kis kis gak okok abe, mideligipal kau ak kirig gil, lilig gi ke ke amnilak. ¹⁵Ñig gek niñlig gi, kiñ karip lim ke ke okok, kiñ ñi sikol kiri okok, bi kib ami sikop kod midelak okok, bin bi gep yib okok, bin bi yib midek okok, bin bi tau dam lel nag wög gelak okok, bin bi gos ke niñil wög gelak okok, magilsek, pirik gi amil kab migan, lim migan okok we gi midelak. ¹⁶⁻¹⁷We gi midil aglak, “Bi sea kiñ ar bisig mideb ak abe, Sipsip Ñilik ak abe cinop yur kib ñinigair ñin kisen per apin ak miñi bir owip ak me, cin midojin rek ma lip. Kab juil aka karip lim yirik kib siñ aul pak pag gi apil, cinop pis nep pab rikek, Bi sea kiñ bisig mideb ak cinop ma niñnimiñ; Sipsip Ñilik cinop minim kib agil pen yur kib ma ñinimiñ,” aglak.

Isrel bin bi koñai nep God kil ne dilak

7 ¹Pen kauyañ ak niñnek, ejol omal omal karip lim gol omal omal ke ke warik midil, yigen omal omal di midil, lim dai, ñig solwara, mab okok, timel ma ginimiñ, agil, dai kiri ke nokim nokim dilig gi midelak. ²Pen yad niñnek, ejol alap pib lim geb pis kid okok nib, God Bi Per Komij Mideb tap kil tik lep ne ak damil, ejol omal omal God agek ulep karip lim ñig solwara gi timel ginig gelak nib okok kirop agak, ³“Piden gim! Bin bi God cin nop wög gi ñibal okok kil ne ak aun beñ kirop alañ tikon; kisen yigen yokem, amil karip lim, ñig solwara, mab tap okok gi timel ginimiñ,” agak.

⁴Pen minim alap aglak niñnek, bin bi God kil ne aun beñ alañ tiklak nib okok, Isrel bin bi wagin ke ke okok jim ñilak ak wan hadred poti po tausan (144,000).

⁵ Bin bi nib okok, Juda wagin ak kiri 12,000;

Ruben wagin ak kiri 12,000;

Gad wagin ak kiri 12,000;

⁶ Asa wagin ak kiri 12,000;

Naptalai wagin ak kiri 12,000;

Manasa wagin ak kiri 12,000;

⁷ Simion wagin ak kiri 12,000;

Lipai wagin ak kiri 12,000;

Isaka wagin ak kiri 12,000;

⁸ Sebyulan wagin ak kiri 12,000;

Josep wagin ak kiri 12,000;

Benjamin wagin ak kiri 12,000,

ak me, jim ñilak ak wan hadred poti po tausan me ak.

⁹Pen minim ñu kil tiksesin nibak dai niñ damil, kauyañ ak dai niñil niñnek, Bi sea kiñ bisig midek ak abe, Sipsip Ñilik ak abe midel niñlig gi, bin bi koñai nep uñin yirik ar kirop siñak warik midelak. Bin bi nib okok, karip lim ke ke lip rek, wagin ke ke lip rek, wak ke ke lip rek, minim yib

ke ke apal rek, okok nib okok nib apil midelak. Bin bi wök pagep rek ma middek nib okok, magilsek walij tid nep ke ke yimil, albad kas di midlig gi, ¹⁰God yib ne agel ar amek niñlig gi, sik kib agil aglak,

“God cin sea kiñ bisig gi mideb ak abe,
Sipsip Ñilik ak abe cinop nen agil gi tep girek ak me,
komiñ amnigabin,” aglak.

¹¹Ejol okok magilsek Bi sea kiñ bisig middek ak abe, bi minim tig bilokep okok abe, tap komiñ omal omal okok abe, kirop piñil kis kis gi midelak. Kiri ap yap kogim yimil, kibor kiyan gil, God yib ne ak dap ranlig gi, ¹²aglak,

“Niñid yib!
God cin yib ke sek mideb, agil,
yib ne agon ar amnañ.
Ne melik tep ke sek mideb, agil,
yib ne agon ar amnañ.
Ne gos tep ke yib mideb, agil,
yib ne agon ar amnañ.
Ne gak ak, nop tep yib, agil,
yib ne agon ar amnañ.
Ne siñ ke yib mideb, agil,
yib ne agon ar amnañ.
Ne tap tari ginim agnigab ak, ak nep ginigab, agil,
yib ne agon ar amnañ.
Ne kilis ke yib mideb, agil,
yib ne agon ar amnañ.
God cin yib nop ak per per nep agon ar amnañ.
Niñid yib!” aglak.

Kauyañ yur ma dinigal

¹³Pen bi kib minim tig bilokep nib okok bi alap, yip ag niñil agak, “Bin bi walij tid yibal nib okok bi an? Pen kiri akal nib opal?” agak.

¹⁴Agek agnek, “Bi kib. Yad ma nipin; pen nak ke nipan,” agnek. Nib agen, yip agak, “Bin bi siñ aul kirop miker ñel, koslam yib midil komiñ opal. Pen kiri Sipsip Ñilik lakañ ne ak dil, walij kiri okok ulik malik gel, tid gip. ¹⁵Nib ak me,

“Kiri God sea kiñ wagin nab siñak midlig gi, piñ nab, kislím eyañ,
sobok gep kariñ ñilik miñan ne ak wög ne gi ñilig gi, midebal.
Bi sea kiñ bisig gi mideb ak
kirop kod mid tep yib ginigab.

¹⁶Kirop yuan kauyañ ma ginigab, ñig nen kauyañ ma ginigab,
piñ kal kauyañ niñil yur ma ginigab.

¹⁷Tari ginig: Sipsip Ñilik sea kiñ nab siñak mideb ak,

sipsip kodep bi kiri midil,
kirop poŋ dil ñig kilam junigab kajon okok amek,
ñig komiŋ magil ñeb ak ñiŋnigal.
Pen God ne udin ñig kirop ak
magilsek lig gi yoknigab,” agak.

Sipsip Ñilik ak nag ar oŋid ak wisibak

8 ¹Pen Sipsip Ñilik ak, nag ar oŋid ak tig ju wisibek niŋlig gi, seb kab ar alaŋ siŋak minim alap ma agek, won ulep alap nep, minit ñin juil nokim alap adik gi dam wajrem alaŋ (30) rek, magilsek kapkap asip yikil midek. ²Pen midil, ejol akniŋ ar oŋid God udin yirik ar siŋak warik midebal okok niŋnek. Ejol niŋ okok akil magil ke ke dilak.

³⁻⁴Pen ejol alap tin tep kab gol dil gilak alap dil midek. Ne pen amiŋ, God nop sobok gipal bid ar gol siŋak alaŋ warik midek. Nop tap dagilel yin ki tep owip ak koŋai nep ñilak. God nop tap sobok gep bid kab gol dil gilak ak, sea kiŋ ar siŋak midek niŋil ejol niŋak, tap ki tep niŋak di God bin bi ne nop sobok gipal minim ak eip ulik malik gil, bid ar siŋak di mogim gi dap dagilek niŋlig gi, sikim niŋak God udin yirik ne ar siŋak yin ap ran jak amnak. ⁵Pen tin tep niŋak dil, mab miŋaŋ God nop tap sobok gep bid ar alaŋ yinek okok di tin miŋan eyaŋ lil, di lim dai wagiŋ eyaŋ yokak niŋil timik aglig gi, kis kis gilig gi amiŋ par sek amek niŋlig gi, aŋim aŋim dilig gi, monmon dak.

Ejol akil magil okok piŋnig gelak

⁶Won niŋak, ejol akniŋ ar oŋid akil magil di midelak okok, di dap ranil piŋnig gelak.

⁷Ejol ned ak, akil magil ne ak piŋek, miŋab nogob magil ak abe, mab miŋaŋ ak abe, lakaŋ ulik malik gilig gi, lim dai wagiŋ eyaŋ soŋ yokak. Niŋ gek, lim dai wagiŋ aul dai omal nokim rek agil, dai omal miderek, dai nokim alap, mab, tap kas komiŋ komiŋ warik midek okok, magilsek yin sibok niŋ amnak.

⁸Pen ejol yigwu nab niŋ ak, akil magil ne ak piŋek, karip lim yirik kib yib mab rek yinek alap, ti paŋ ñig solwara nab siŋadaŋ di yokak. Niŋ gek, ñig solwara siŋak dai omal nokim rek agil, dai omal miderek, dai nokim alap ñig solwara magilsek lakaŋ lak. ⁹Pen kibsai tap ñig solwara midelak okok, dai omal nokim rek agil, dai omal miderek, dai nokim alap magilsek kim saklak. Niŋ magöb ñig solwara siŋak midelak okok dai omal nokim rek agil, dai omal miderek, dai nokim alap piŋ nep pak jisipik masipik gi paŋil amnak.

¹⁰Pen ejol yigwu nokim niŋ ak, akil magil ne ak piŋek, gap poglin kib mab miŋaŋ rek apiŋ, seb kab ar alaŋ niŋ piŋil juak. Niŋ gek, ñig par okok abe, ñig kilam okok abe, dai omal nokim rek agil, dai omal miderek, gap

poglin kib nibak dai nokim alap ar siŋak ap yowak. ¹¹Gap nibak yib ne, “Marasin Silek”. Nig gek, ñig ar okok abe, ñig kilam okok abe, dai omal nokim rek agil, dai omal miderek, dai nokim alap gi timel gak. Bin bi koŋjai yib nep, ñig gi timel gak nib okok ñibil kimlak.

¹²Pen ejol yigwu par ak, akil magil ne ak pigeke, pib, takin, gap okok tap alap pakek, melik tep per gip rek ma gak. Pib ak, dai omal nokim rek agil, dai omal miderek, dai nokim alap gi timel gak. Takin ak, dai omal nokim rek agil, dai omal miderek, dai nokim alap gi timel gak. Gap okok, dai omal nokim rek agil, dai omal miderek, dai nokim alap gi timel gak. Pib melik magil ak, dai omal nokim rek agil, dai omal miderek, dai nokim alap pib melik ma gak. Kislim nab eyaŋ magil ak, dai omal nokim rek agil, dai omal miderek, dai nokim alap takin melik ma gak.

¹³Pen yad nig gil niŋ midil niŋlig gi niŋnek, yakir dik alap seb kab nab alaŋ ug ajlig gi, minim kib yib aglig gi agak, “Ake! Ake! Ake! Timel yib ginig geb. Ejol ognap sek akil magil kiri pignig gebal. Ejol omal nokim nib okok akil magil kiri okok pigel, bin bi lim dai ar wagin aul midebal okok kirop gi timel yib ginigab!” agak.

Ejol mamid alaŋ akil magil ne ak pigak

9 ¹Ejol mamid alaŋ, akil magil ne ak pigeke niŋlig gi, yad niŋnek, gap seb kab ar alaŋ nib piŋil ju lim dai wagin eyaŋ ap yap pakil midek. Pen gap nibak nop ki ur kau migan kiriŋ ma juip ak ñelak. ²Gap nibak ki ur ak dil, kau migan kiriŋ ma juip kijoŋ ak yikek, sikim kib yib ap raniŋ, pib ak pirau ñek, kislim owak. ³Nig gek, joŋ golbid okok, sikim nab nib okok nib ug gi dam lim dai ar eyaŋ lil, God ne gek, tilabok okok bin bi piŋil yur ñinigaŋ rek ginig gelak. ⁴God ne joŋ golbid nib okok kirop agak, “Tap kas, mab kas, tap tari tari lim dai wagin eyaŋ tanib okok, gi timel ma ginimib; bin bi kil yad ak aun beŋ kiri alaŋ ma mideb okok nep gi timel ginimib,” agak. ⁵God agak nibak, joŋ golbid okok bin bi kirop pis nep ñag pak lel kimnimel rek ma lak; yokop takin aknib mamid alaŋ yur timel aknib ke kirop ñinimel rek lak. Kirop yur ñinigaŋ nibak, tilabok okok bin bi piŋil yur ñib rek ñinigaŋ. ⁶Ñin nab nibak, bin bi nib okok kimnigabin, agil niŋnigaŋ ak pen kimeb kijoŋ tam alap ma midenigaŋ.

⁷Joŋ golbid nib okok, bi kaj hos dam pen pen ñagnig, tap kilis lipal rek okok li midelak. Nabic cög kiri ar alaŋ usaŋil bad kab gol dil gilaŋ okok rek tol gilaŋ. Milik jo milik kiri okok bin bi rek lak. ⁸Nabic kimkas kiri okok, bin nabic kimkas rek lak. Pen meg kiri okok, kain sapeb layon apal ak, meg rek lak. ⁹Pabil okok, ain sior rek ak lilak. Pen koŋjai nep auan pakelak ak me, kaj hos koŋjai nep gadal badal okok koŋjai nep lip gi dam pen pen ñagnig amil, gi gu gip rek agak. ¹⁰Cimgan dai eim, tilabok amin bin bi suek yur gip rek ak lak. God gek, takin aknib mamid alaŋ, bin bi okok kirop yur ke timel yib ñilig gi midenigaŋ. ¹¹Joŋ golbid nib okok kiŋ

kiri, ejol kau miḡan kiriḡ ma juip kod mideb ejol nibak me. Hibru minim agil, yib ne Abadon apal pen Grik minim agil, Apolyon apal.^b

¹²Nib ak, miker kib ned ak bir kir giḡ pen miker kib omal mideb.

Ejol kagol oḡid ak akil magil ne ak piḡak

¹³Pen ejol kagol oḡid ak, akil magil ne pigeḡ niḡlig gi yad niḡnek, minim alap apeḡ bid kab gol dil giḡak ar siḡak, kom omal omal midoligiḡ nab siḡak nib. Bid nibak God uḡin yirik ar siḡak alaḡ mideḡ. ¹⁴Minim nibak ejol kagol oḡid akil magil di mideḡ ak nop agak, “Ejol omal omal nag ḡon gel, ḡiḡ kib yib Yupretis gol siḡak midebal okok, wisib yokan,” agak. ¹⁵God ejol omal omal nib okok kirop ned ag lek, mi nibak nep, takin nibak nep, ḡin nibak nep, won nibak nep kod mideligiḡal ak me, ḡin nibak bir owak rek, bin bi lim dai ar waḡin aul koḡai nep ḡag pak lilaḡ, agil, wisib yokak. Bin bi lim dai ar waḡin aul midebal okok magilsek dai omal nokim rek agil, dai omal miderek, dai nokim alap ḡag pak linig amnilak. ¹⁶Pen yip aglak niḡnek, ami bi kaj hos ar bisig gil bin bi pen pen ḡag pak linig amnilak okok tu hadred miḡon (200,000,000) midelak.

¹⁷Pen yad niḡnek, kaj hos kiri okok abe, bi hos ar bisiglak okok abe, kapa sior yimlak okok, ognap mab milaḡ lakaḡ rek gak, ognap kab mik “sapaia” apal ak rek gak, ognap kab wiḡalin “salpa” apal ak rek gak. Kaj hos nabic okok, layon nabic rek lak. Meg miḡan kiri alaḡ nib mab milaḡ abe, sikim abe, tap salpa ki timel silek yib ak abe owak. ¹⁸Meg miḡan kiri alaḡ nib mab milaḡ abe, sikim abe, tap salpa ki timel silek yib ak abe apiḡ gek, bin bi koḡai nep kim saklak. Bin bi lim dai ar waḡin aul midebal okok magilsek dai omal nokim rek agil, dai omal miderek, dai nokim alap kimlak. ¹⁹Kaj hos nib okok kilis kiri ak mideḡ meg miḡan kiri abe, amin dai eim kiri abe. Amin kiri okok, soiḡ nabic rek lak ak me, bin bi okok kirop gi timel ginimel rek lak. ²⁰Pen tap timel nib okok gek, bin bi koḡai nep kim saklak ak, bin bi midelak okok gak nibak niḡil, tari ginig kab mab tap okok dil ḡinmagil cin ke nep tap tom gi lipin agil, ma kirig giḡak. Tari ginig tap si tap timel giḡin agil, ma kirig giḡak. Pen tap yokop okok, tap uḡin ma niḡip okok, tap minim ma peyiḡ niḡip okok, tap kaniḡ ma tagip okok, tap kab gol, silpa, bras, kab, mab dil gi lilak okok nep sobok gin agil, kiḡeki kiyob ḡilik tap timel okok kirop nep sobok gin agil, gi midelak. ²¹Pen cip ḡagil, kij wanam gil, bin si bi si giḡ, tap si dil, gel amek niḡlig gi, tari ginig niḡ giḡin, agil, ma kirig giḡak.

Ejol alap Jon nop mij ḡek ḡiḡak

10 ¹Pen dai niḡ damil niḡnek, ejol kilis yib akniḡ ke alap seb kab ar alaḡ nib aposip. Ejol nibak nop seb tid alap kom kam gek niḡlig

^b 9:11 Hibru minim Abadon abe, Grik minim Apolyon abe, minim waḡin ak “Bi bin bi ḡag pak lep.”

gi, sibeñ nabic ne pag kis kis gil, milik jo milik ne ak pib rek melik gil, tob kid ne ak mab yinil milaŋ gip rek ak gak. ²Ne seb kab ar alaŋ nib apil, tob yipid kid ak ñig solwara ar ak tauil, tob aŋidken kid ak lim ar ak tauak. Mij sikol bad alap tig pis dilig gi midek. ³Pen ne kaj layon minim tigoŋ agip rek ak agek, timik aknib ar oŋid minim kib agil minim aglak. ⁴Timik aknib ar oŋid minim agel niŋlig gi, yad minim agesal nibak ñu kil tiknim, ag gos niŋnek ak pen minim alap seb kab ar alaŋ nib agak, “Timik aknib ar oŋid agesal minim nibak sek ñu kil ma tiknimin; minim nibak we gil mideŋ,” agak.

⁵Pen ejol tob pis kid ak ñig solwara ar ak tauil, pis kid ak lim ar ak tauil midek niŋnek ak, ñin yipid kid ne ak dap ranil, God karip lim ar alaŋ siŋak yomak. ⁶Ñig gil, God per nep per nep komiŋ mideb ak, seb kab ar alaŋ tap okok magilsek gi lak ak, lim dai tap okok magilsek gi lak ak, ñig solwara tap okok magilsek gi lak ak, God niŋek nibak mideb rek niŋid yib agebin agil, agak, “God miñi tapin ma kod mideniŋab! ⁷Pen ejol ar oŋid ak akil magil ne pignig ginigab ñin nibak nep, God ne minim agep bi nop wög gilak okok kirop agak rek nep, minim ne we gil mideb ak miñi ginigab,” agak.

⁸Pen minim seb kab ar alaŋ nib ned niŋnek ak, yip kauyaŋ agil agak, “Ejol tob pis kid ak ñig solwara ar tauil, pis kid ak lim ar tauil mideb ak nop amil agek, mij sikol tig pis gi di mideb ak, nep ñinimiŋ,” agak.

⁹Nib agek, yad ejol midek siŋak amil, yip mij sikol piyak ak ñan, agen, yip ñilig gi agak, “Di ñiŋan. Niŋek, meg miŋan nak ak bom ñig yidek kabiam gip rek ginigab ak pen kogi nab eyaŋ amil silek ginigab,” agak. ¹⁰Agek, mij sikol nibak ejol ñinmagil ar ne ak nib dil ñiŋen, bom ñig yidek kabiam rek gak ak pen ñib kom jal yoken, kogi nab eyaŋ amil silek gak.

¹¹Pen yip agak, “Bin bi karip lim ke ke okok koŋai nep, wak ke ke okok koŋai nep, minim yib ke ke okok koŋai nep, kiŋ karip lim okok kod midebal ke ke okok koŋai nep, kisen kirop tari tari ginigab ak, God minim ak kauyaŋ ag ñinimin,” agak.

Bi God minim ag ñeb omal

11 ¹Pen yip yir par tap li nipal alap ñilig gi aglak, “Am God sobok gep karip ak li niŋil, God nop tap sobok gipal bid ar ak li niŋil, ginimin. Bin bi God sobok gep karip ñilik miŋan apil nop sobok gipal okok ak rek nep, wök pag niŋnimin. ²Pen Juda bin bi mer okok, per apil wari soŋ nab eyaŋ midebal rek, kau nibak sek ma li niŋnimin. Tari ginig: kiri nep taun kib tid Jerusalem gi timel gilig gi midel midel, takin aknib ñin juil omal adik gi dam yigwu nab nib ak (42) amniŋab. ³Yad pen, bi minim yad ag ñeb omal ag yoken, yokop wad ajil rek okok yimil, minim yad ag ñi ajer, ñin aknib wan tausand tu hadred siksti (1260) amniŋab,” agak.

⁴Bi God minim agep nib omal, Bi Kib lim dai wagin aul kod mideb ak, udin yirik ne sijak midebir. Kiri mab olip ur omal, lam omal me. ⁵Pen bin bi ognap kirop mal gi timel ginig genigal ak, mab milaŋ meg miŋan kiri sijak nib apil, kirop yin saknigab. Kirop mal gi timel genigal bin bi okok, kirop nig aknib rek nep ginigab. ⁶God kirop mal kilis ne ñek, minim agep wög ne gi damlig gi, miñab ma pakaŋ, ager, ma paknigab; ñig okok lakañ laŋ, ager, lakañ linigab; bin bi okok kirop miker tari tari okok gaŋ, ager, ginigab. Ñin titi nig ginimiŋ agnigair ak, nig aknib rek nep ginigab. ⁷Pen God minim ak ag ñi damil, dai ag sakel, tap sapeb kau miŋan kiriŋ ma juip eyaŋ nib onigab ak, kirop mal eip pen pen gi damil, pis nep ñag pak lek kimnigair.

⁸Cip se par nib omal midenigair taun kib yib ak tibep nab sijak. Taun kib yib nibak me, Bi Kib ak nop mab kros bak alaŋ ñag pak lilak. Pen taun kib yib nibak yib alap Sodom, yib alap Ijip, apal.

⁹Pen bin bi karip lim okok ke ke midebal okok, wagin ke ke midebal okok, minim ke ke apal okok, wak ke ke lip okok, kirop mal niŋlig gi nep midil, cip se par nib omal dam tigel ma ginimib, agel, kimnigair ñin dai ak tikil, ñin omal nokim sek kau sijak nep mider niŋlig gi, bin bi nib okok cip se par nib omal niŋ cici li midenigal.

¹⁰Bi God minim agep nib omal, bin bi lim dai ar wagin aul midebal kirop miker kib ñi midöligipir rek, pen paj agil, tap kib ñiblig gi, tap tep pen ñek pen ñek ginigal.

¹¹Pen ñin dai ak abe, ñin omal nokim abe, cip se par nib omal okok miderek pen God ne ake bad alap yokek nab kirop eyaŋ amek warikil nanil miderek. Nig gak niŋil, bin bi niŋelak okok kirop jel yib gak. ¹²Pen bi God minim agep nib omal niŋrek, minim kib alap seb kab ar alaŋ nib, “Niri owir!” agak. Bin bi kausal maual kiri mal okok niŋ midel niŋlig gi, seb tid alap kirop kom kam gi dek, God karip lim seb kab ar alaŋ sijak amnerek.

¹³Pen won nibak nep, monmon kib yib dil, taun kib nibak dai aknib wajrem alaŋ rek agil, dai aknib ajiŋ ak midelak niŋil dai nokim alap pag jisipik masipik gek, bin bi sepen tausan kim saklak. Pen bin bi midelak okok, tap gak nibak niŋil pirikil, God karip lim seb kab ar alaŋ sijak mideb ak nop yib agel ar amnak.

¹⁴Pen niŋim! Miker kib yigwu nab nib ak bir padikip, pen miñi miker kib yigwu nokim nib ak ulep ginig geb.

Ejol ar oŋid ak akil magil ne pigak

¹⁵Won nibak nep ejol ar oŋid ak, akil magil ne ak pigeke niŋlig gi, minim alap seb kab ar alaŋ nib agil agak,

“Miñi Bi Kib cin ak, Kraiss ne ak eip,

karip lim okok magilsek per nep per nep kod midenigab,” agak.

¹⁶Pen bi kib minim tig bilokep ñin juil nokim alap adik gi dam yigwu par alaŋ ak (24), sea kiŋ ar kiri ak God uđin yirik ne bisig midelak okok, kogim yimil kibor kiyan gił, God nop sobok gilig gi aglak,

¹⁷“God, nak Bi Kib kilis ke yib ak!

Ned mideligipan, miñi midep nep mideban!

Bi kilis aknił ke yib per mideban rek,

miñi bin bi karip lim okok magilsek

Kiŋ kiri mideban ak rek,

nep tep yib agobin!

¹⁸Bin bi karip lim okok nił nep niŋil, kal yib julak.

Pen miñi nak kal juep ñin ak bir miñi owip.

Miñi bin bi kimlak okok kirop

minim kib agep ñin ak bir miñi owip.

Miñi bin bi nep wög gił,

minim nak ag ñibal okok abe,

bin bi minim tep nak niŋ dil,

yib nak niŋil kaun dipal okok abe,

bin bi yib sek midebal aka

tam okok midebal okok magilsek,

tap tep kirop pen ñinigan,

ñin niłak bir miñi owip.

Pen bin bi abramek gił,

bin bi ognap kirop ñag pak lipal okok,

kirop pen ak rek nep ñag pak linigan,

ñin niłak bir miñi owip,” aglak.

¹⁹Nił agel niŋlig gi, God sobok gep karip seb kab ar alaŋ siŋak mideb ak miŋan yikek, God Minim midek kes won ak miseŋ lak niŋnek. Won niłak nep añim añim dil, timik agil, gu kib yib ak agil, monmon dil, miñab nogob magil kib yib pakil, gak.

Bin ak abe toi ubil kib ak abe

12 ¹Pen dai niŋ damil niŋnek, tap ke kisen nił kib alap seb kab nab siŋ epel gak. Bin alap pił waliŋ rek lil, tob ne takin ar siŋak lil, gap aknił umiŋan alaŋ ak, kwin tol giłal rek usajił bad ne nabił ar alaŋ lek midek. ²Pen ne ñi paiŋaŋ tikniŋ, ñi paiŋaŋ ñiłbek niŋlig gi, wög paklig gi gek.

³Tap ke kisen nił alap sek, seb kab nab siŋ epel miseŋ lek niŋnek. Toi ubil lakañ sek kib yib aknił ke alap midek. Nabił cög ne aknił ar oŋiđ lil, kom ne aknił wajrem alaŋ lil, kiŋ tol giłal usajił bad okok, nabił cög ar ne ke ke lil midek. ⁴Toi ubil kib niłak, amin ne ak gap seb kab ar alaŋ okok pakek, koŋai nep pig ju lim dai wagił aul ju yowak. Nił ak, gap magilsek midelak okok dai omal nokim rek agil, dai omal miderek,

dai nokim alap pig li ju yokak. Pen ne bin ñi painaŋ tik donig gek ak, tik dapek ñinjin, agil, apil kod midek. ⁵Pen bin nibak ñi alap tik dowak. Ñi nibak ne ain yir par dil, bin bi karip lim okok magilsek kod midenigab. Pen bin ak ñi nibak nop tik dapek, ejol alap ñi nibak pili gi dil, dam God ne sea kiŋ ne seb kab ar alaŋ mideb siŋak dad amnak. ⁶God bin nibak nop kau alap gi lek, pirik gi miñ mab kab nep mideb nab nib okok amil, nib okok nep midek niŋlig gi, God nop tap magil ñilig gi kod midenigab ñin akniŋ wan tausand tu hadred siksti (1260) amniŋab.

⁷Pen seb kab ar alaŋ siŋak, ejol kib Maikel ejol ne okok dil amil, toi ubil kib nibak yakam ne okok eip pen pen gilig gi damil me, ⁸⁻⁹toi ubil kib ak yakam ne okok sek, seb kab ar alaŋ nib ñag yik yokil pis nep lim dai wagiŋ aul yoklak. Toi birarik ped okok midek, toi nibak kijeki aka Seten apal ak, ne nep bin bi karip lim tigoŋ tigoŋ magilsek kirop minim esek agek, minim esek ne ak niŋlak.

¹⁰Pen minim kib alap seb kab ar alaŋ siŋak nib agil agak,
“Miñi God ne bin bi okok di komiŋ yokniŋab.

Miñi God ne kilis ne dil, bin bi karip lim tigoŋ tigoŋ magilsek
Kiŋ kib ke yib midenigab.

Miñi God Kraiŋ ne ak nep,

Bi Kib kilis ke yib midil,

bin bi karip lim tigoŋ tigoŋ magilsek kod midenigab.

Tari giŋig: Seten ne God udiŋ yirik ne siŋak midil,

piŋ nab, kislim eyaŋ,

ai mam cin okok tap si tap timel tari tari gipal okok agoligiŋ ak,
nop lim dai wagiŋ eyaŋ di yoklak.

¹¹Pen ai mam cin okok,

Sipsip Ñilik lakañ ne ak abe,

Kraiŋ minim niŋid ne ak miseŋ ag ñöligiŋal ak abe gek,

Seten nop di mok kirop okok lilak.

Bin bi ne nep midobin, agil, ma pirik gil,

cinop ñag pak linig ñag pak lilaŋ, ag gos niŋlak.

¹²Nib ak, nibi seb kab ar alaŋ siŋak midebim okok,

miñ miñ gilig gi midenimib.

Pen nibi lim dai abe, ñig solwara siŋak abe midebim okok,
nibep yimiŋ nipin.

Tari giŋig: Seten nop nibi midebim siŋ eyaŋ di yokel,

ñin ne koŋai ma mideb rek, kal yib juip,” agak.

¹³Pen toi ubil kib nibak, yip lim dai ar wagiŋ aul di yokpal, agil, gos ak niŋil, bin ñi tik dowak nibak nop yik gi yokek pen, ¹⁴God bin nibak nop yakir dik kib auan kib omal li ñek, ne ug gil miñ mab kab nep mideb nab siŋak God kau ne gi lak nibak amnak. Amil nib okok midek niŋlig gi, God ne nop tap magil ñilig gi kod midek, mi omal nokim takin akniŋ

kagol oñid amnigab. Toi ubil ak bin ak nop tap timel alap ginimiñ rek ma linigab.

¹⁵Pen toi ubil ak, ñig ulik rek wök yoken bin nibak nop uñid amnañ, agil, wökak ak, ¹⁶pen lim ak bin nibak nop gi ñek, ñig toi ubil ulik rek wök yokak nibak lim dai miñan okok pak pag gi amil, kir kir gek amnak. ¹⁷Ñig gek, toi ubil ak bin nibak miñik kal yib yapek, bin ak ñi painañ ne okok, kiri God Miñim ageb rek gil, Jisas miñim niñid ne niñ dil, kisen gil, bin bi ognap kirop ag ñibal bin bi okok eip kirop pen pen ginig amnak. ¹⁸Pen toi ubil ak amil ñig solwara gol siñak warik midek.

Tap sapeb alap ñig solwara nab okok nib apjakak

13 ¹Midil niñnek, tap sapeb rek alap, ñig solwara nab okok nib apek. Nabic cög ne akñib ar oñid lil, kom akñib wajrem alañ lil, kiñ tol gipal usajil bad okok, kom dai ke ke lil midek. Pen nabic ne akñib ar oñid ak, God nop ag juep yib timel ognap nokim nokim ñu kil tik lel midek. ²Tap sapeb nibak, kain sapeb lepad rek lak ak pen tob ne okok kain sapeb bea tob rek lak. Meg miñan ne ak, kain sapeb layon meg miñan rek lak. Pen toi ubil ak, kilis ne ke abe, kiñ kib ke yib midek kilis ak abe, tap sapeb nibak nop ñak. ³Pen tap sapeb nibak nabic cög ne alap, ned pis nep ñag pak lel bir gak rek lak ak pen kauyañ milep gak. Niñ gek, bin bi lim dai ar wagin aul tiñoñ tiñoñ magilsek gos gos lil, tap sapeb nibak nop kisen gilak. ⁴Pen toi ubil nibak kiñ kib ke yib midek kilis ak tap sapeb nibak nop ñak ak me, bin bi okok toi ubil nibak nop yib agel ar amnak. Pen tap sapeb nibak abe kiñ kib ke yib rek mideb ak, bin bi ognap nop eip pen pen ginimel rek ma lip, agil, bin bi okok magilsek tap sapeb ak, ak rek nep yib ne agel ar amnak.

⁵Pen God tap sapeb nibak nop niñebir kirig gek, yib ne ke agek ar amek, God yib ne miñim timel agil dap yapek, takin akñib ñin juil omal adik gi dam akñib yigwu nab nib ak (42) amnak. ⁶Ne niñ gil, God nop ag juil, yib nop miñim timel agil, kariñ lim ne seb kab ar alañ siñak ag juil, ar alañ siñak ne eip midebal okok kirop ag juil, gak. ⁷Pen God tap sapeb nibak nop niñebir kirig gek, Kraiss bin bi ne okok eip pen pen gil, ñag juil, bin bi okok magilsek, wagin ke ke midebal rek, kariñ lim ke ke midebal rek, miñim yib ke ke apal rek, wak ke ke lip rek, kirop magilsek kodil midek. ⁸Bin bi lim dai ar wagin aul tiñoñ tiñoñ magilsek rek, tap sapeb nibak yib ne agel ar amnigab. Pen bin bi okok, kariñ lim birarik ped okok ma gi lak ñin ak, God bin bi per komiñ nep mideniñal buk nib eyañ yib kiri ñu kil tikak okok nep, tap sapeb nibak yib ne agel ar ma amnigab. Buk nibak, Sipsip Niñik ñag pak lel kimak ak buk ne me ak.

⁹Nibi bin bi gos timid midoniñiñ okok miñim nib aul niñim!

¹⁰Bin bi God miñ amñilañ, agil, niñip okok, miñ amñial.

Bin bi tu par kid dil piñ lel kimlañ, agil, niñip okok,
tu par kid dil piñ lel kimnigal.

Nig ginigab rek, Kraiss bin bi ne okok, cin bin bi nokim alap ma yap
pakin, agil, Kraiss minim tep ak niñ di kilis gil, ageb rek nep gil, Kraiss
nop cig tep gilig gi nep midenimel.

Tap sapeb alap sek lim dai nab eyañ nib apjakak

¹¹Pen kauyañ niñil niñnek, tap sapeb rek alap sek lim dai nab eyañ nib
bu agil apjakak. Kom ne omal ak, sipsip ñilik kom rek lak ak pen minim
ne ak, toi ubil rek agak. ¹²Ne tap sapeb ned nib ak nop wög gi ñilig gi,
bin bi karip lim okok magilsek minim kilis agil gek, tap sapeb ned nib
ned pis nep ñag pak lel bir gak rek lak ak pen kauyañ milep gak nibak
nop yib agel ar amnak.

¹³Tap sapeb kisen nib ak tap ma gep rek gil, tap niñep ma niñep rek
gil, gak. Bin bi niñ midel niñlig gi, ne gek, mab milañ seb kab ar alañ
nib alap lim dai wagin eyañ yowak. ¹⁴Pen God ne tap sapeb kisen nib
nibak niñebir kirig gek, tap sapeb ned nib udin yirik ne siñak tap ma
gep rek gek ak me, bin bi lim dai tiñon tiñon magilsek minim tom ne ak
niñ dilak. Tap sapeb kisen nib ak bin bi okok kirop agek, kiri tap sapeb
tu par kid di pis nep ñag pak lilak ak pen kauyañ mideb ak yib ne dap
rannig, tap nop rek kaunan alap gi lilak. ¹⁵Pen God tap sapeb kisen nib
ak nop niñebir kirig gek, tap kaunan tap sapeb ned nib rek gi lilak nibak
nop ake bad ak pigek amek, komiñ lil, minim agil agak, “Yad bi kib. Yib
yad nep agem ar amnañ,” agak. Nib agek, bin bi yib ne agel ar ma amnak
okok magilsek agek kirop ñag pak lilak. ¹⁶Ne agek, bin bi yib midek
okok, bin bi yib ma midek okok; bin bi mani koñai midek okok, bin bi
mani ma midek okok; bin bi nag wög gelak okok, bin bi gos kiri ke wög
gelak okok; kiri magilsek kil alap ñinmagil yipid kid ak aka aun beñ alañ
dilak. ¹⁷Pen bin bi kil nibak ma dilak okok, tap taunimel rek aka tap
sikim ginimel rek ma lak. Kil nibak me, tap sapeb ak yib ne aka naba ne
me ak.

¹⁸Bin bi gos niñ tep gipal okok minim wagin nibak piyo niñnimel rek
lip. Niñ tep gil me, tap sapeb nibak naba ne wagin ak niñnigal. Naba
nibak, bi alap yib ne ak mideb. Naba nibak me kagol kagol kagol (666).

Bin bi koñai nep kimep kisen nib alap aglak

14 ¹Pen kauyañ niñil niñnek, Sipsip Ñilik ak Saion Dim gol alañ
ranlig midek niñlig gi, bin bi wan hadred poti po tausán
(144,000) okok nop eip midelak. Bin bi ne eip midelak nib okok, aun beñ
kiri alañ yib ne ak abe, Nap yib ak abe ñu kil tik lel midek. ²Pen minim
alap seb kab ar alañ siñak nib ñig sij kib piñil gu agip rek aka timik gu
parsek agip rek ak agek niñnek. Minim nibak, tap gita rek pakpal agip

rek ak agak. ³Pen bin bi wan hadred poti po tausan (144,000) nib okok kiri sea kiŋ ar siŋak adaŋ midil, tap komiŋ omal omal abe, bi minim tig bilokep okok abe niŋ midel niŋlig gi, kiri kimep kisen nib alap aglak. Kimep kisen nib nibak, bin bi lim dai ar wagin aul nib ognap niŋnimel rek ma lak; bin bi wan hadred poti po tausan (144,000) God tau adik dak nib okok nep kimep nibak niŋnimel rek lak. ⁴Bi nib okok kiri bin eip ma gi tapal; bi praj rek midebal. Sipsip Ñilik ne akal ameb niŋil, nop kisen gipal. Krais kirop bin bi nab okok nib tau adik dil, God nop abe, Sipsip Ñilik nop abe kirop tap magil ned pag dopal rek nep ñak. ⁵Minim tom ognap ma apal; tap si tap timel ognap ma gipal.

Ejol omal nokim minim ag ñilak

⁶Pen kauyaŋ ak niŋil niŋnek, ejol alap seb kab ar siŋ epel ug gi ajlig gi, bin bi lim dai ar wagin aul, wak ke ke lip rek, wagin ke ke midebal rek, minim yib ke ke apal rek, kariŋ lim ke ke midebal rek, Krais minim tep per midenigab ak kirop ag ñinig gak. ⁷Sik kib agil agak, “God ne minim kib agnigab ñin ak bir owip rek, God nop jel gek piriknimib. Bi Kib seb kab ar alaŋ, lim dai wagin aul, ñig solwara, ñig kilam okok magilsek gi lak ak, yib ne ak agem ar amnaŋ,” agak.

⁸Ejol alap, ejol ned ak nop kisen gilig gi agak, “God gek taun kib Babilon pis nep ap yap pakip o! Bin bi Babilon okok kiri bin si bi si gi, gi timel aknib ke gel gel, bin bi kariŋ lim tigoŋ tigoŋ magilsek niŋil nib aknib rek nep gilak. Babilon ne ñig wain kilis ne ke ñibil, bin bi kariŋ lim ke ognap okok kirop ñek ñibel, ne gip rek, kiri ak rek nep saköl ñagek gi timel nep gilak,” agak.

⁹Ejol alap pen, ejol ned omal ak kirop kisen gil, sik kib agil agak, “Bin bi tap sapeb ak yib ne dap ranlig gi, tap kaunan nop rek niŋil gi lilak ak yib ne dap ranlig gi, kil ne ak aun beŋ alaŋ aka ñinmagil ar siŋak dinigal bin bi okok, ¹⁰God nop milik yib yapek, ñig wain silek yib ak, kap kirop eyaŋ pagek ap ran jakek, ñek ñiŋnigal. Ejol siŋ okok abe, Sipsip Ñilik ak abe niŋ midel niŋlig gi, kirop ag mab ke eyaŋ ak yokek, mab milaŋ salpa sek ak kirop yinek niŋlig gi, wög pak midenigal. ¹¹Mab milaŋ ak kirop yinek niŋlig gi, mab sikim nibak taniŋ, gi damil, per per nep ap ranlig gi midenigab. Nib ak, tap sapeb nibak yib agel ar amnigab bin bi okok, tap kaunan nop rek gilak nibak yib agel ar amnigab bin bi okok, yib ne kil nibak dinigal bin bi okok, God kirop pen yur kib yib ak piŋ nab, kislim eyaŋ, per per nep ñinigab,” agak. ¹²Nig ginigab rek, Krais bin bi ne okok ap yap ma pakin, agil, God Minim ageb rek niŋ di wös gil, ageb rek gil, Jisas nop cig tep gilig gi nep midenimel.

¹³Pen minim alap seb kab ar alaŋ nib yip agak, “Minim agniŋ gebin aul ñu kil tiknimin. Miñi miŋer gip ñin aul, bin bi Bi Kib nop niŋ dil kimnigal okok, miñ miñ ginigal,” agak. Agek, God Kaun ne agak, “Niŋid

yib. Kiri miker dilig gi wög koslam gi midebal rek, kiri ake lil, miñ miñ gilig gi midenigal,” agak.

Tap magil wög lim dai aul pok gip

¹⁴Pen yad niñnek, bi ñi rek bi alap, seb tid bad ar siñak bisig midek. Nabic cög ne alaņ, kab gol dil usajil bad gilak alap tol gil, tu agon gilopi rek gogeb gip tu kid yib wid magil tik dopal rek alap dil midek.

¹⁵Pen ejol alap, God sobok gep karip ñilik migan eyaņ nib apil, bi seb tid bad ar siñak bisig midek ak nop sik kib agil agak, “Lim dai wagin ar eyaņ wid magil okok bir pok gip. Wid tik dowep ñin ak owip rek, tu agon gilopi rek nak nibak dil, tik dap mogim gan,” agak. ¹⁶Agek, bi seb tid bad ar siñak bisig midek ak, tu agon gilopi rek ne ak di tib gi rik marik gil, wid magil lim dai wagin ar okok tanek okok magilsek tib gi rik marik gi dap mogim gak.

¹⁷Ejol alap pen God sobok gep karip ñilik migan seb kab ar alaņ siñak nib sōņ owak. Ne ak rek nep tu agon gilopi rek alap dil midek.

¹⁸Won nibak nep, ejol mab milaņ kod midek ak, God nop tap sobok gep bid ar siñak nib apil, ejol tu agon gilopi rek dil midek ak nop sik kib agil agak, “Wain magil lim dai ar eyaņ nib okok pok gip rek, tu agon gilopi rek nak ak di wain magil magilsek tik dap mogim gan,” agak. ¹⁹Nib agek, ejol nibak, tu agon gilopi rek ne ak di tib gi rik marik gil, wain magil okok tik dam, God nop milik yapek wain magil tau cib jakep kau migan ak yokak. Kau nibak God bin bi gi timel gipal okok kirop pen yur ñinimiņ rek mideb.

²⁰Wain magil tau cib jakep kau migan nibak taun kib mis ken midek. Wain magil migan nibak yokek, tau cib jakel niņlig gi, lakañ ak tan ap ran jakil, ñig ulik kib ap yowip rek, u ag ap yaplig gi, kilomita aknib ñin juil ajip pis adaņ (300)^c rek amnak. Lakañ ulik kib nibak kaj hos nabic ar pelok mideb rek ak nep ar pelok amek.

Ejol okok genigal, miker kib ke ke aknib ar oņid ak ginigab

15 ¹Pen tap ke kisen nib niņil wal agep rek alap sek, seb kab nab siņ epel gak niñnek. Miker aknib ar oņid okok gek, God nop milik yib yowip ak pis nep dai junigab, agil, ejol ne aknib ar oņid okok kirop agek, miker kib nib okok dapil lim dai wagin aul oniğ gelak.

²Pen wagin nib siñak niñnek, ñig cöb glas rek alap mab milaņ sek ulik malik gil siñak midek. Bin bi tap sapeb yib naba mideb tap ak abe, tap kaunan nop rek gilak ak abe eip pen pen gil win gilak okok, gol nib siñak warik midelak. God kirop tap gita rek ke ke ñek, ³bi Mosis God nop wög gi ñoliğip minim ak abe, Sipsip Ñilik minim ak abe aglig gi, kimep aglig gi aglak,

^c 14:20 Grik minim agil 1,600 stadia

“God, nak Bi Kib kilis aknib ke sek,
 tap tari ginigain agnigan, ginigan.
 Nak kiñ bi kib karip lim okok magilsek,
 Kiñ kiri mideban ak,
 per per yipid gil,
 niñid rek nep gipan.
 4 Bin bi magilsek nep niñil kaun dinigal.
 Nak nokim nep siñ mideban.
 Nep, Bi Kib, agil,
 yib nep agel ar amnigab.
 Nak nag yipid gil ar ak nep
 gi tep gipan ak niñil,
 bin bi karip lim okok nib okok nib magilsek apil
 nep sobok ginigal,” aglak.

5 Pen yad kauyañ niñil niñnek, God nop sobok gep sel karip siñak Karip Ñilik Migan Komiñ Tep Ke Yib ak kijon yikil midek. 6 Pen ejol aknib ar oñid ak, bin bi lim dai ar wagin aul okok kirop miker kib aknib ar oñid ñinig, God sobok gep karip ñilik migan eyañ nib soñ olak. Ejol nib okok, walij tid tep mimelik gak okok nep lil, sib nag kab gol dil gilak okok pabil nab siñak pog lil olak. 7 Tap komiñ omal omal nib okok nokim alap apil ejol aknib ar oñid okok kirop kinañ kab gol dil gilak ke ke ñak. Kinañ migan nib okok, Bi Kib per per midenigab ak, bin bi gi timel gel God kirop milik kal niñil miker ñinigab ak ap ran jakil midek. 8 God melik tep ke ne ak abe, kilis timel ne ak abe gek, sikim kib yib God sobok gep karip nibak ap ran jakil midek. Bin bi alap sobok gep karip nibak ñilik migan amnimel rek ma lak. Ejol aknib ar oñid ak, miker kib aknib ar oñid bin bi ñinig gelak okok ñi saknigal ak nep, kisen karip ñilik migan nibak amnimel rek linigab.

Ejol miker kib aknib ar oñid okok di dolak

16 1 Pen yad niñnek, minim alap God sobok gep karip ñilik migan eyañ nib ejol aknib ar oñid okok kirop sik kib agil agak, “Bin bi gi timel gel God kirop milik kal niñil miker ñinigab ak, kinañ aknib ar oñid kajon alañ ap ran jakil mideb okok, dam lim ar eyañ soñ gem amnañ,” agak.

2 Nib agek, ejol ned ak kinañ ne dam lim ar eyañ soñ gek, bin bi tap sapeb kil ak dil, tap kaunan nop rek gilak sobok gelak okok, kirop soi sapeb yur kib dep okok lak.

3 Ejol yigwu nab nib ak, kinañ ne dam ñig solwara ar ak soñ gek, ñig solwara ak, bi kimal lakañ ak rek lil, tap ñig solwara nab nib okok midelak okok, magilsek kim saklak.

4 Ejol yigwu nokim nib ak, kinañ ne dam, ñig kilam juip okok abe ñig yokop ap yowip ar okok abe soñ gek, ñig okok magilsek lakañ lak. 5 Pen ejol ñig magilsek kod mideb ak agak,

“Nak Bi Siņ.

Nak birarik ped okok mideligipan; nak miñi ak rek nep mideban.

Nak minim tig bilok tep yib gil,

kirop niņ yipid gil nig gipan.

6 Bin bi nib okok nep me, bin bi nak okok kirop ñag pak lil,

bi minim nak agep okok kirop ñag pak lil gel,

lakañ kiri yowak ak me,

nak kirop pen ak rek nep lakañ ñek ñibebal ak,

kiri ke gil dipal me ak,” agak.

7 Nib agek, minim alap God nop tap sobok gep bid ar siņak nib agak,

“God Bi Kib kilis timel ke yib,

nak minim tig bilok tep yib gil,

kirop niņ yipid gil nig gipan,” agak.

8 Ejol yigwu par ak, kinaņ ne ak dam pib ak nop soņ gek, bin bi okok kirop pib kal yib niņniņiņ rek lak. 9 Kal yib niņil, kirop tapin yinak ak pen tap si tap timel gelak ak, tari ginig nig gipin, agil, kirig gil, mid tep gil, God yib ne agel ar ma amnak. God cinop miker ñeb ak, agil, nop ag julak.

10-11 Ejol mamid alaņ, kinaņ ne ak dam tap sapeb sea kiņ ne ar siņak soņ gek, bin bi ne kod midek nab siņak dai kislim gak. Soi sapeb lil, yur kib gek, aleb su ribik gelak ak pen tap si tap timel gelak ak, tari ginig nig gipin, agil, ma kirig gilak; gilig gi nep midil, God seb kab ar alaņ siņak mideb ak nop ag julak.

12 Ejol kagol oņid ak, bi kiņ karip lim pib apeb okok nib onigal, agil, kinaņ ne ak dam ñig kib yib Yupretis soņ gek, ñig nibak pis nep milep gak.

13 Niņ gek niņlig gi, kiyob ñilik omal nokim as omal nokim rek lek niņnek. Alap toi ubil meg migan ne siņak nib apjakak; alap tap sapeb meg migan ne siņak nib apjakak; alap bi God minim agebin agil minim esek nep agip ak meg migan ne siņak nib apjakak. 14 Kiyob ñilik nib okok tap ma gep rek ginimel rek lak. Kiri amil kiņ karip lim ke ke tigoņ tigoņ kod midebal okok magilsek poņ dil dap mogim gil, God Bi kilis ke sek ñin kib ne ag lak nibak, pen pen ginigal.

15 “Niņ tep ginimib! Yad onig gebin ak, bi tap si dep okok ma niņ midebal won ak nep apal rek ak onigain! Nib ak me, bin bi wisin ma kinil, walij yim tep gil midenigal okok miñ miñ ginigal; magil nep okok ajel, kirop nabiņ ma ginigab!”

16 Pen kiyob ñilik nib okok, bi kiņ karip lim ke ke okok nib kirop poņ dil dap mogim gilak; karip lim dap mogim gilak nibak Hibru minim agil Amagedon apal.

17 Ejol ar oņid ak, kinaņ ne ak soņ gak nab nep ar alaņ okok. Soņ gek, minim alap sea kiņ God sobok gep karip ñilik migan eyaņ nib sik kib

agil agak, “Dai juip,” agak. ¹⁸Nib agek niñlig gi, timik agil gu gek amek niñlig gi, añim añim dilig gi kasin magil bol okok ap yap pakil, monmon kib yib bin bi lim dai ar wagin aul ned ma niñeligipal rek alap owak. ¹⁹Monmon kib yib nibak dil, taun kib yib Babilon ak pok gil, asik lilig gi dai omal nokim lil, taun kib karip lim ke ke okok karip tap okok tig ju pag jisipik masipik gebin, agil, kosil masil gak. Gak nibak, God ne milik kal niñil, Babilon bin bi göligipal ak saköl ma gil, kirop ñig silek kap tib alaņ ap ran jakak ak ñek ñiņlak. ²⁰Pen karip lim sikol ñig tib kis kis gak okok abe, karip lim yirik okok abe, pis nep kir gak. ²¹Miker kib yib ak me, miñab nogob magil kib yib okok, won nokim nokim ñin juil omal adik gi dam aknib wajrem alaņ (50) kilo rek, seb kab ar alaņ nib yapil, bin bi okok kirop tapin nep pakak. Kirop tapin nep pakek God nop pis nep ag julak.

Bi si dep bin ak yur kib dinigab

17 ¹Ejol aknib ar oņid miker ke ke dolak okok, alap apil yip agak, “Siņaul apek, nep tap alap yomen niņan! God genigab bi si dep bin timel yib ak pen yur kib dinig geb. Taun kib yib ñig koņai nep ulep siņak mideb ak nep agebin. ²Bi kiņ karip lim ke ke midebal okok, bi si dep bin nibak eip gi ajlig gi, bin bi lim dai ar wagin aul yokop okok ak rek nep, tap si tap timel ne giņ ak kirop ñig wain ne ñek ñibel, kirop saköl ñagip,” agak.

³Pen God Kaun ak yip goņ lek niñlig gi, ejol ak yip dam miñ mab kab nep mideb nab okok dad amek niņnek, bin alap, tap sapeb lakaņ alap ar alaņ bisig midek. Tap sapeb nibak, miņ goņ pinbak ne siņak, yib God nop ag juep koņai yib nep ñu kil tik lel midek. Nabic cög ne aknib ar oņid ak lil, kom aknib wajrem alaņ lil gak. ⁴Pen bin niņnek nibak, walij lakaņ bin kib lipal rek lil, kab gol koņai nep, kab tep tep mani kib tauep koņai nep, magil kolim sikol kibap milep rek tid giņ “pöl” apal ak koņai nep, miņ goņ ne ak magilsek tib kadig lek, melik melik gilig gi midek. Kap kab gol dil gilak alap di midek. Kap miņan nib eyaņ, bi eip si gil tap si acir timel yib gek okok kajoņ alaņ ap ran jakil midek. ⁵Aun beņ ne alaņ miņim we gil midoligip alap ñu kil tiklak:

TAUN KIB YIB BABILON AK, BIN SI BI SI GI AJPAL OKOK ABE, BIN BI NAG TIMEL YIB GIPAL OKOK ABE, BIN NONIM KIRI ME AK.

⁶Pen yad niņnek, bin nibak, bin bi Jisas niņ dil miņim tep ne miņeņ ag ñelak kirop ñag pak lilak bin bi okok, lakaņ kirop ñig wain rek ñibil saköl ñagil midek.

Gak nibak niñil, pak ju dil gos par li midenek. ⁷Pen ejol nibak yip agak, “Tari giņig pak ju dil gos par rap lipan? Tap sapeb nabic aknib ar oņid lil, kom aknib wajrem alaņ lil giņ tap nibak abe, bi si dep bin tap sapeb ar alaņ bisig ajeb ak abe, miņim wagin ak nep ag ñiņigain. ⁸Tap

sapab niņeban nibak, ned midoligip, miñi ma mideb, pen ulep mideb, ne kau migan kiriņ ma juip eyaņ nib apenigab, God gek pis nep kir ginigab. God karip lim birarik ped okok ma gi lak ñin ak, bin bi lim dai ar wagin aul midebal kirop dinigain agil gos niņak bin bi okok, yib kirop ñu kil tikak buk ne eyaņ. Pen bin bi yib kirop ñu kil ma tikak okok, tap sapab nibak kauyaņ midenigab ak niņil, wal yib agnigal. Tari ginig: ne ned midoligip, miñi ma mideb, pen kisen kauyaņ midenigab.

9“Minim nib okok niņ tep gil nep me, niņnigal. Tap sapab nabic ne aknib ar oņid mideb niņesan ak, minim wagin ar omal mideb. Nabic aknib ar oņid nib okok, dim aknib ar oņid bin nibak bisig mideb okok me. 10Pen nabic aknib ar oņid nib okok, kiņ aknib ar oņid okok me. Kiņ nib okok, aknib mamid alaņ kiņ midil bir kimlak, pen miñi kagol oņid ak ne kiņ mideb. Kiņ ar oņid ak kisen onig geb. Pen apenigab ak, sikol won alap nep midenigab. 11Pen tap sapab ned midoligip, miñi ma mideb ak, ne ke kiņ jil oņid ak onigab. Ne me, kiņ aknib ar oņid okok nib bi alap. God gek ne pis nep ap yap paknigab. 12Pen kom aknib wajrem alaņ niņesan okok, kiņ aknib wajrem alaņ. Kiri miñi kiņ ma midebal pen kisen God gek kiri aua nokim alap nep kiņ midil, tap sapab ak eip wög gilig gi, bin bi okok kod midenigal. 13Kiri gos ar nokim niņil, tap sapab ak nop agel, ne kau kirop ak dil, bin bi okok kirop kod midenigab. 14Kiņ nib okok, Sipsip Ñilik ak eip pen pen ginigal ak pen ne bi kib okok magilsek Bi Kib kiri midil, kiņ okok magilsek Kiņ kiri mideb rek, nop ñag pak linimel rek ma lip. Bin bi ne ke sik agil dip okok, nop cig gilig gi nep midenigal rek, ne eip kiņ nib okok gel pis nep ap yap paknigal,” agak.

15Pen ejol nibak yip agak, “Ñig okok bi si dep bin bisig midosip niņesan ñig nib okok, bin bi wak ke ke lil, minim yib ke ke agil, karip lim ke ke midebal okok me. 16Kom aknib wajrem alaņ niņesan okok abe, tap sapab niņesan ak abe, bi si dep bin ak nop milik kal yib niņil, tap ne okok magilsek pili gi denigal ak me, magil nep midenigab. Pen mib goņ ne ak ñibil, dai dai midenigab okok dagilel yin sibok amnigab. 17Tari ginig: God kirop gos ñek, gos ar nokim niņil, tap sapab ak nop agek, kau kiri ak dil gek amek me, God ginigab agil ag lak rek nep ginigab. 18Pen bi si dep bin niņesan nibak, ne me taun kib yib kiņ ke ke okok magilsek kod mideb taun kib nibak,” agak.

Babilon ap yap paknig geb

18 1Pen dai niņil niņnek, ejol alap sek seb kab ar alaņ nib aposip. Ejol nibak, God ag lek bi kib yib midek. Seb kab ar alaņ nib apil, melik tep ne ak gek, lim dai wagin aul magilsek melik gek. 2Ejol nibak apil sik kib agil agak,

“God gek taun kib yib Babilon pis nep ap yap pakip o!
Pis nep ap yap pakip o!

- God gek taun kib nibak, bin bi alap ma mideb yib;
 kijeki kiyob ñilik yakir timel okok nep mideb e.
- 3 Tari ginig: bin bi Babilon okok kiri bin si bi si gil,
 gi timel aknib ke gel gel,
 bin bi karip lim ke ke okok magilsek niñil,
 nib aknib rek nep gipal.
 Babilon ne ñig wain kilis ne ke ñibil,
 bin bi karip lim ke ognap okok kirop ñek ñibel,
 ne gip rek, kiri ak rek nep
 saköl ñagil gi timel nep gipal.
 Kiñ lim dai ar wagin aul okok,
 ne eip gi ajal, gi timel nep gipal.
 Pen ne tap tep tep okok dinim agil per gos niñip rek,
 bi lim dai ar wagin aul tap sikim gipal okok mani kib dipal,”
 agak.
- 4 Pen yad niñnek, minim alap sek seb kab ar alañ nib agak,
 “Bin bi yad Babilon midebim okok, taun nibak mis ar amil,
 Babilon kai eip ulik ma ginimib.
 Tap si tap timel kiri gipal okok, nibi eip ma ginimib.
 Yur kib kiri dinig gebal ak, nibi ak rek nep ma dinimib.
- 5 Tap si tap timel gipal gac ak, tap asmen kib rek am am
 kib yib ap ran amnak seb kab ar alañ.
 God niñil kiri tap si tap timel gipal ak
 gos niñlig gi mideb.
- 6 Babilon ne bin bi ognap kirop gi timel gip rek ak,
 nak pen nop ak rek nep gi timel ginimin.
 Pen Babilon ne bin bi ognap kirop gi timel gip rek nep mer;
 nop pen gi timel ke yib ginimin.
 Babilon ne bin bi ognap kirop ñig silek ñib rek mer;
 nop pen ñig silek ke yib kap ne soñ gil nop ñek ñiñnimin.
- 7 Tap koñai nep dinim, agil, yib ne ke dap ranib rek ak,
 nop pen yur mab aknib ke yib ñek, yimig yib ginimij.
 Gos ne ke niñil agip,
 ‘Yad bin kwin siñaul bisig midebin.
 Yad bin kañil ma midebin;
 miker ognap yip dinimij rek ma lip,’ agip.
- 8 Nib agip ak
 pen God Bi Kib
 nop minim kib agil yur ñinigab ak,
 bi kilis aknib ke yib mideb.
 God Bi Kib ne gek, ñin nokim alap nep miñak kib ginigab;
 sil kib agnigab; tap magil ma pilnigab, yuan kib ginigab.

Pen God Bi Kib ne gek,

Babilon mab milaŋ yap yin sibok ñib amnigab.

⁹“Babilon mab yinił sikim ap ranek niŋlig gi, kiŋ karip lim ke okok nił bin nibak eip gi aĵoliġipal okok yimiġ gek sil agniġal. ¹⁰Bin ak nop yur mab ke yib ġiniġab niłak, cinop ak rek nep ġinimiŋ rek lip, aġil, ke ke siŋ adaŋ midil sil aġil agniġal,

‘Mer e! Mer e! Taun kib ke yib e!

Babilon taun kib kilis ke yib e!

Nak aua nokim alap nep minił kib niŋil,

pen yur kib dil pis nep ap yap pakpan,’ agniġal.

¹¹“Pen taun kib niłak ap yap pakniġab rek, bi tap sikim ġoliġipal okok, miłni bin bi okok tap cinop ma tauniġal, aġil, yimiġ gek sil agniġal. ¹²Tap kiri nił okok me, kab gol, kab silpa, kab sikol tep tep ke ke mani kib taupe, maġil kolim sikol kibap milep rek tid ġip ‘pöl’ apal ak; laplap tep yib tap ‘linin’ apal ak tik dam pak ñag dör ġoliġipal ak, laplap mik, laplap lakañ, laplap kobkaunaŋ cib nag rek di ñag dör ġil ‘sil’ apal ak; mab ki tep owep ke ke okok; kaj elepad meg kib dil tap ke ke koŋai nep ġoliġipal okok; mab bog tep tep mani kib taupe tap ke ke koŋai nep ġoliġipal okok; tap ain rek ‘brons’ apal ak, ain ak, kab ‘mabil’ apal ak dil tap ke ke koŋai nep ġoliġipal okok; ¹³tap ki tep owep ñiġ ke ke okok, pauda ke ke okok ‘sinamin’ ak, ‘spais’ ak, ‘yinsens’ ak, ‘mö’ ak, ‘praginsens’ ak; ñiġ wain abe, olip wel abe; wid maġil abe, plaua abe; kaj kau abe sipsip abe; kaj hos abe, tap kaj hos ñon gel lip ġi dad ajpal okok abe; bin bi kirop tau dapel nag wög ġoliġipal okok abe, bin bi eip pen pen ġil kirop nag li dapel nag wög ġoliġipal okok abe. Tap kiri sikim ġoliġipal nił okok me ak.

¹⁴“Pen bi tap sikim ġoliġipal okok Babilon nop agniġal, ‘Mib ġoŋ nak gos ġip tap tep tep nak okok maġilsek dai kir ġip. Kab gol, silpa, mani, tap tep ke ke koŋai nep nak ak maġilsek bir kir ġip. Kisen kauyaŋ ma dinigan,’ agniġal.

¹⁵“Bi Babilon siŋak tap okok sikim ġil mani kib döliġipal bi okok, Babilon ak nop yur mab ke yib ġiniġab niłak, cinop ak rek nep ġinimiŋ rek lip, aġil, ke ke siŋ adaŋ midil yimiġ gek sil aġlig ġi ¹⁶agniġal,

‘Mer e! Mer e!

Taun kib ke yib e!

Taun kib kil tep nibaul, waliġ tep tep,

laplap tep yib linin tik dam pak ñag dör ġoliġipal ak,

laplap mik, laplap lakañ dil, tib kađig li midoliġip;

kab gol, kab sikol tep tep ke ke mani kib taupe,

maġil kolim sikol kibap milep rek tid ġip “pöl” apal ak dil,

tib kađig li midoliġip.

¹⁷Pen miłni aua nokim alap nep tap tep tep ne nił okok

magilsek bir pis nep kir gip,' agnigal.

“Ñig magöb kapten okok abe, bi wög gep kiri okok abe, bin bi ñig magöb ar ajpal okok abe, bin bi ñig magöb tap kako di sikim gipal okok abe, magilsek ke ke siñ adañ midenigal. 18 Ke ke siñ adañ midil, taun kib nibak mab yinil sikim kib silpil amenigab ak niñil agnigal, ‘Taun kilis ke yib aul rek alap ned ma midoligip e!’ agnigal. 19 Kiri silikil dil, nabic ar kiri alañ di yoklig gi yoklig gi agnigal,

‘Mer e! Mer e! Babilon taun kib kilis ke yib e!

Babilon ne midek niñlig gi, kab gol, kab silpa, mani,
tap tep tep mani kib tauap tap okok ke ke koñai nep midek,
ñig magöb ajlig gi, mani koñai nep dipin ak,
pen miñi aua nokim alap nep tap tep ne nib okok
magilsek bir pis nep kir gip,' agnigal.

20 “Pen God ne gek Babilon pis nep pag jisipik masipik gi yap mideb ak,

nibi seb kab ar alañ midebim okok
paj agil wobi yal yal agil miñ miñ ginimib!

God gek, bi si dep bin nibak pis nep ap yap pakip ak,
nibi Kraiss bin bi ne midebim okok abe,

Kraiss minim tep ne dad ameb bi okok abe,
God minim agep bi okok abe, nibi wobi yal yal agil
miñ miñ ginimib!

Ne nibep gi timel gip ak niñil,

God ne nop minim kib agil,
nop pen yur kib yib ñib me ak,” agak.

21 Pen magil nibak, ejol kilis ke yib alap, kab kib yib wid magil pak cib jakil plaua gipal kab ak rek alap di ñig solwara nab siñak di yokil agak,

“Ñig aknib rek nep taun kib ke yib Babilon
tig wal gi yokel kisen bin bi kauyañ ma niñnigal.

22 Babilon bin bi miñ miñ gilig gi, tap gita rek paklig gi,
gaub paklig gi, akil magil piglig gi, ma midenigal.

Wög ar ke ke gipal rek ak, ma ginigal.

Wid magil pak cib jakil plaua gipal rek ak, ma ginigal.

23 Bin bi lam melik taun kib nab nibak kauyañ ma niñnigal.

Bin bi ñel dil, ber mal midil, miñ miñ gil, ma ginigal.

Bin bi nak sikim göligipal okok amil,
karip lim ke ke okok bi kib yib midelak.

Pen bin bi nak kij wanam gil, minim esek agil gel,
bin bi karip lim ke ke okok

niñil magilsek kisen gil,
niñ aknib rek nep gi timel göligipal.

24 “Babilon bin bi okok nep,

God minim agep bi ne okok kirop ñag pak lil,
bin bi ne okok kirop ñag pak lil, göligipal.

Bin bi lim dai ar wagin aul ñag pak lipal bin bi okok magilsek
Babilon wagin ne gek nig gak.

Nig gip rek, God nop pen yur kib yib ak ñib,” agak.

19 ¹Ejol kilis ke yib ak minim nibak ag dai juek niñlig gi yad gu kib
yib peyig niñnek. Gu nibak, bin bi koñai nep seb kab ar alaṅ miñ
miñ gilig gi, meg migan dap ranil aglak,

“God yib ne agon ar amnaṅ!

God cin nep bin bi di komiṅ yokeb.

God cin nep melik tep ke sek mideb.

God cin nep bi kilis ke yib mideb.

²God cin minim kib agil, minim tig bilok tep gil,

bin bi okok kirop pen yipid gil nep ñib.

Bi si dep bin timel yib nibak,

bi si dil eip gi ajil gek,

bin bi karip lim ke ke okok nib apil,

ne gek ak niñil, nig akñib rek nep gi timel göligipal.

Bin nibak ne God bin bi nop wög göligipal okok ñag pak lak ak me,

God ne nop minim kib agil pen yur kib ñib,” aglak.

³Nib agil, kauyaṅ meg migan dap ranil aglak,

“God yib ne agon ar amnaṅ!

Taun kib ke yib Babilon yin sikim gil,

sikim ak per per nep ap rannigab,” aglak.

⁴Nib agelak, bi minim tig bilokep ñin juil nokim alap adik gi dam
yigwu par alaṅ (24) okok abe, tap komiṅ omal omal okok abe, God sea
kiṅ ar bisig midek wagin siṅak kogim yimil kiyan gil aglak,

“Niñid yib!

God yib ne agon ar amnaṅ!” aglak.

⁵Nib agelak, minim alap sea kiṅ midek siṅak alaṅ nib agil agak,

“Nibi bin bi tam okok abe, bin bi gep okok abe,

God cin nop wög gil nop pirikpim okok

magilsek yib ne agem ar amnaṅ,” agak.

Krais bin bi ne okok kirop di karip lim ne amek, miñ miñ ginigal

⁶Pen won ak yad gu kib yib alap, ñig sij piñil agip rek aka timik agek
parsek ameb ak rek, peyig niñnek. Gu nibak, bin bi koñai yib nep meg
migan dap ranil aglak,

“God yib ne agon ar amnaṅ!

God Bi Kib cin ak Bi kilis ke yib.

Ne Kiṅ midil bin bi okok

kirop magilsek kod mideb.

7 Nib ak, tep gek niñlig gi miñ miñ gin;
 God ne Bi kilis ke yib mideb ak niñil,
 yib ne agon ar amnañ.

Tari ginig: Sipsip Nilik ak bin ne dinigab ñin ak bir owip rek,
 bin ak karip ne amnig, tap gi jin gilig gi mideb.

8 Linin dil walij siñ tid mimelik gilig gi mideb alap,
 God bin ne nop ñek yimib,” aglak.

Linin walij tep nibak wagin ak, God bin bi ne gi tep gipal nib okok me ak.

9 Pen ejol nibak yip agak, “God minim niñid yib ageb ak, minim ne ognap agen ñu kil tikninin. Ne ageb, ‘Bin bi Sipsip Nilik ak sik agek amil ne eip tap kib niñnigal bin bi okok miñ miñ yib ginigal,’ ageb” agak.

10 Pen ejol nibak nib agek, yad tob wagin ne siñak kogim yimil, nop sobok ginim, agnek ak pen yip agak, “Nak nig ma ginimin! God nop nokim nep sobok ginimin. Nak abe, ai mam nak okok abe, Jisas minim tep ne ak niñ dil ageb rek gipim rek ak, yad ak rek nep bi God nop wög gi ñeb bi alap midebin. Jisas minim niñid ag miserñ lip minim tep ak nep dil, God minim agep bi ne okok minim apal,” aglak.

Krais kaj hos tid ar alañ bisig gil ajek

11 Pen won ak niñnek, seb kab ar alañ migan yikak niñil Bi alap kaj hos tid alap ar siñak bisig midek. Bi kaj hos ar bisig midek Bi nibak, yib ne omal: yib ne alap Cig Gip, yib alap Yipid Gil. Ne bin bi okok kirop minim kib agil, minim tig bilok tep gil, pen yur ñib ak, abramek ma ñib, gipal gipal rek nep niñil ñib. Nig aknib rek nep ak, bin bi okok eip pen pen gil ñag yik yokip ak, gos niñ tep gil, minim tig bilok tep gil, pen pen gil ñag yik yokip. 12 Udin ne ak mab milañ rek. Kiñ tol gipal usajil bad koñai nep nabic ar ne alañ lek mideb. Mib goñ ne siñak yib alap mideb. Pen yib nibak, bin bi ognap ma nipal; ne ke nep niñip. 13 Walij yim mideb ak, lakañ tim lek lakañ sek mideb. Pen yib ne ak, “God Minim.” 14 Ami Bi seb kab ar alañ siñak nib okok, walij tid kaig tep yib par ke ke lil, kaj hos tid ar okok ke ke bisig gil, nop kisen gilak. 15 Meg migan ne eyañ, tu par kid yib alap apjakak. Tu par kid nibak dil, bin bi karip lim ke ke okok eip pen pen gil ñag pak lil, ain yir par alap dil, kirop kod midenigab. Pen God ag lak ñin nibak, God Bi Kib, Bi kilis ke yib ak, bin bi gi timel gil nop yo nipal okok kirop milik kal yib niñil, wain magil rek dil, God wain magil tau cib jakep kau migan ak yokil, Bi kaj hos tid ar bisig mideb nibak kirop pak cib jaknigab. 16 Pen walij par ne ak abe, tob male ne ak abe, yib alap ñu kil tiklak mideb:

KIÑ OKOK KIÑ KIRI AK, BI KIB OKOK BI KIB KIRI AK

17 Pen yad niñnek, ejol alap pib nab siñak alañ warik midek niñlig gi, yakir ug gi ajalok okok kirop sik kib agil agak, “God nibep tap magil kib

ñinig geb ak, magilsek apil mogim gim! ¹⁸Apil, kiñ okok miñ goñ kirop ñibil, ami bi kod midep bi kib okok miñ goñ kirop ñibil, ami bi kilis okok miñ goñ kirop ñibil, kaj hos okok miñ goñ ñibil, bi kaj hos dad ajpal okok miñ goñ kirop ñibil, ginimib. Pen bin bi nag wög gipal okok, bin bi gos kiri ke wög gipal okok, bin bi yib kib midep okok, bin bi yib ma midep okok magilsek, miñ goñ kirop ñiñnigabim,” agak.

¹⁹Pen won ak niñnek, tap sapeb ak abe, kiñ lim dai wagin aul ke okok nib okok nib abe, Bi kaj hos tid di ajip ak eip, ami bi ne okok eip pen pen ginig, ami bi kiri okok dap mogim gilak. ²⁰Nig gelak ak pen Bi hos tid di ajek ak, tap sapeb ak abe, bi ne bin bi okok kirop minim esek agil tap ma gep rek goligip ak abe, kirop mal di cici lil, mab milañ salpa sek yin midep cöb eyañ yokak. Pen tap sapeb bi ne ak ne ned bin bi koñai nep minim esek agek, tap sapeb kil ak dil, tap kaunan ne rek gilak ak, sobok göligipal.

²¹Pen Bi kaj hos tid di ajek ak, tu par kid meg migan ne eyañ nib apjakak nibak, ami bi okok kirop magilsek ñag pak lek, yakir okok apil miñ goñ kirop okok ñib ñib mer niñil kirig gilak.

Seten nag midek mi akniñ wan tausand yinnigab

20 ¹Pen won ak niñnek, ejol alap kau migan kirin ma juip ki ur ak abe, sen kilis yib bol ak abe, ñinmagil ne ak dilig gi, seb kab ar alañ nib aposip. ²⁻³Dapil, toi ubil ak, toi birarik ped okok nib ak, nop di cici lil, bin bi kariñ lim ke ke okok kirop kauyañ esek ma ginimiy, agil, nag ñon gi dam kau migan kirin ma juip nib eyañ yokil, kijon pilin gil, kilis gi tep yib gak. Nig gek, ne nib okok nag midek midek, mi akniñ wan tausand amek, kauyañ ak wisib yokek apil, sikol won alap yokop gi ajenigab. Toi birarik esek agep nibak me, kijeki ak, Seten nep.

⁴Pen niñnek, bin bi ognap kaun kiri kiñ sea bisigep ar ke ke okok bisig midelak. Bin bi nib okok, God agek kiri bin bi okok kirop minim kib agil minim tig bilokniñ gelak. Pen bin bi nib okok, tap sapeb ak nop ke abe, kaunan ne rek gilak tap ak abe ma sobok gil, kil ne aunbeñ kiri alañ aka ñinmagil kiri ak ma dil, Jisas minim tep ne bin bi okok kirop misen ag ñil, God Minim ageb rek nep gil gelak niñil, kirop nabic tib gi riklak. Yad niñlig gi midenek niñlig gi, kaun nib okok komiy lil, Kraiñ eip bin bi okok kirop kiñ rek kod midel midel, mi akniñ wan tausand ak yinak.

⁵(Pen bin bi ognap kimlak okok, ñin nibak ma wariklak. Mi wan tausand ak yinek, kisen wariklak.) Minim agebin aul, God ne ned gek bin bi nib okok wariklak ak nep agebin. ⁶Bin bi ned warikniñal okok, God bin bi ne ke nep midil tep gek niñlig gi, miñ miñ yib gilig gi mideniñal. Kauyañ ma kimniñal. Kiri God Kraiñ kirop apil mal sobok gep bin bi rek wög gi ñilig gi midil, Kraiñ eip bin bi okok kirop kiñ rek kod midel midel, mi akniñ wan tausand ak yinnigab.

Seten yur kib dinigab

⁷Mi wan tausand nibak ap amnigab niŋlig gi, God ejol ne okok kirop agenigab, Seten nop nag wisib yokel, ⁸amil bin bi karip lim ar wagin aul ke ke okok magilsek midebal okok kirop minim esek agniŋgab. Bin bi nib okok me, Gog eip Megog eip. Seten kirop magilsek lip gi dapek, kiri pen pen ginig onigal. Bin bi pen pen ginigal nib okok, kab kilip niŋ solwara gol okok konjai nep mideb rek nep midebal. ⁹Kiri miŋan okok miŋan okok nib apil, taun kib God bin bi ne kin midelak ak, taun kib God ne midmagil lip nibak nep, piŋil kis kis gelak. Taun piŋil kis kis gilak ak pen dai mab miŋan seb kab ar alaŋ nib apil, kirop yin sibok niŋ amnak. ¹⁰Pen God ejol ne okok, kijeki bin bi okok kirop minim esek agil lip gi dowak ak, nop dam cöb mab miŋan salpa sek yin gopen geb miŋan eyaŋ di yoklak. Tap sapeb ak abe, bi ne bin bi okok kirop minim esek agoligip ak abe, ned cöb nib eyaŋ yokel miderek. Melik abe, kislim abe, per per nep yur mab dilig gi midenigal.

Minim kib kisen yib ak

¹¹Pen sea kiŋ tid kib yib alap abe, Bi ar nibak bisig midosip ak abe niŋnek. Bi Kib ne siŋak midek niŋlig gi, lim dai wagin aul abe, seb kab ar alaŋ abe, dai pis nep pirikil ke okok amek, kauyaŋ ma niŋnek. ¹²Pen yad niŋnek, bin bi kib midil kimlak okok abe, bin bi tam okok midil kimlak okok abe, magilsek apil sea kiŋ wagin nib siŋak warik midel niŋlig gi, mij ognap tig pis gilak. Mij alap, bin bi kiri komiŋ midlig gi, gilak gilak rek niŋil, nu kil tiklak. Mij nibak tig pis gil, mij alap tig pis gilak. Mij kisen nib tig pis gilak ak, bin bi per per komiŋ midenigabal yib kiri nu kil tiklak. Tig pis gilak niŋil God ne bin bi kimlak okok tap tari tari gilak ak niŋil, minim tig bilokil, kirop nonim lak. ¹³Pen bin bi niŋ solwara nab okok kimlak okok amel niŋlig gi, God ne kirop minim kib agak. Kimeb Won ak abe Cip Kaun Karip ak abe bin bi kimil am kod midelak okok kirop magilsek dam nel niŋlig gi, kiri ke ke tap tari tari gilak ak niŋil, God kirop minim kib agak. ¹⁴God ne niŋ gak niŋil, Kimeb Won ak abe Cip Kaun Karip ak abe, God agek kirop mal dam mab miŋan yineb cöb eyaŋ di yoklak. Mab miŋan yineb cöb ambir ak, Kauyaŋ Kimnigal, apal. ¹⁵Pen bin bi per per komiŋ midenigal okok yib kiri nu kil tiklak mij nibak, bin bi an an yib kiri mij nibak ma midek, God agek, kirop magilsek ak rek nep dam mab miŋan yineb cöb eyaŋ di yoklak.

Lim dai wagin aul abe, seb kab ar alaŋ abe ke kisen nib lak

21 ¹Midil niŋnek, lim dai kisen nib abe, seb kab kisen nib abe midek. Lim dai ned nib ak abe, seb kab ned nib ak abe bir kir gil ma midek. Niŋ solwara ned midoligip ak, ak rek nep bir kir gil ma

midek. ²Pen yad niñil niñnek, God gek Taun Kib Siñ ak, Jerusalem kisen nib ak, seb kab ar alañ siñak nib aposip. Taun Kib Siñ nibak, bin okok bi dinig, walij kil tep lil kod midebal rek ak midek.

³Pen yad peyig niñnek, sea kiñ midek nab siñak nib, minim kib sik agil agak, “Miñi tikil, God ne ke bin bi okok eip kariñ gi lil midenigab. Ne bin bi okok eip kin midenigab niñil kiri bin bi ne midenigal. God ne ke kirop eip midil, God kiri midenigab. ⁴Ne udiñ ñig udiñ kiri mideb ak magilsek lig gi yoknigab. Bin bi ma kimmigal; miker dek, yimig gek sil ma agnigal; yur ma dinigal. Tari ginig: lim dai ned nib ak bir kir gil miñi ma mideb,” agak.

⁵Pen Bi kiñ sea ar bisigak ak yip agak, “Yad tap magilsek kisen nib gi lebin,” agak. Nib agil yip agak, “Minim agebin aul ñu kil tikninin. Minim nibaul, minim niñid yib, bin bi okok pis nep niñ dinimel,” agak. ⁶Nib agil yip agak, “Tap miñi agesin okok magilsek bir gipin. Yad birarik ped okok midöligipin, kisen per nep per nep midenigain. Yad nep gen, tap okok magilsek wagin gil mideb. Yad nep gen, tap okok magilsek kir ginigab. Bin bi an ñig nen gonimiñ, kirop agen, ñig kilam nib ñig komiñ magil ñeb ak ñiñnigal; ma taunigal, yokop nep ñiñnigal. ⁷Bin bi miker apek, gos par ma niñil, yip cig gilig gi nep midenigal okok, kirop tap agesin aul magilsek ñinigain. Yad Nap kiri miden, kiri ñi pai yad midenigal. ⁸Pen bin bi God nop cig gon, cinop miker onigab agil piriñpal okok; bin bi yip niñ dil kirig gipal okok; bin bi tap timel yib tap gac yib gipal okok; bin bi cip ñapal okok; bin si bi si gipal okok; bin bi kij wanam gipal okok; bin bi god tom tap yokop okok sobok gipal okok; bin bi minim esek apal okok; kiri magilsek am midenigal cöb mab milañ salpa sek yineb ak. Bin bi miğan nibak amnigal ak, Kauyañ Kimnigal, apin,” agak.

Jerusalem kisen nib

⁹Ejol akniñ ar oñid ned kinañ kiri dapesal okok, ejol nokim alap apil yip agak, “Apek, Sipsip Ñilik ak, bin ne dinig geb ak, bin nibak nep yomen niñnigan,” agak. ¹⁰Nib agek, God Kaun ak yip goñ lek niñlig gi, ejol ak yip dil, dam kariñ lim dim yirik kib yib i ar oklañ alap dad amil, yip yomek niñnek, Taun Kib Siñ ak, Jerusalem ak, God seb kab ar alañ mideb siñak nib aposip. ¹¹God Jerusalem kisen nib ak yokek apek niñlig gi niñnek, God ne melik tep ke sek mimelik gip rek ak, taun nibak ak rek nep melik tep ke sek mimelik gosip. Taun kil tep nibak kab tep tep mani koñai taupe rek, kab jasper mimelik gip rek ak, mimelik gil midek. ¹²Kab wari par yib Jerusalem kisen nib ak kis kis gil, kijoñ tam akniñ umigan alañ okok midek. Kijoñ tam akniñ umigan alañ okok kijoñ ke ke midek. Pen ejol akniñ umigan alañ kaniñ tam kijoñ nib okok ke ke kod midelak. Kaniñ tam kijoñ nib okok, dai ar alañ Juda wagin ke ke akniñ umigan alañ midebal rek, kijoñ akniñ umigan alañ okok ke ke ñu kil tiklak.

¹³Kanib tam kijon nib okok: pib apeb omal nokim; pib ma apeb omal nokim; pib ma ameb omal nokim; pib ameb omal nokim. ¹⁴Pen wari nibak ned wagin gil, kab par kib aknib umigan alaṅ parsek li li dil, kisen wari gilak ar nibak. Kab par kib nib okok, Sipsip N̄ilik minim dad ameb bi aknib umigan alaṅ okok, yib kiri okok ñu kil tikel midek.

¹⁵Ejol yip minim agosip nibak yir kab gol dil gilak alap dil midek. Yir nibak rek dil, tap alap yir adip adip lil, tap nibak par titi gil rek mideb ak wök pag nipal. Pen ejol yir nibak dil taun kib nibak li niṅnig gek; kanib tam kijon abe, kab wari ak abe, taun kib magilsek li niṅnig gek. ¹⁶Pen ejol ne yir nibak dil, taun nonim ak yir ak di adip adip lil, taun kib nibak par titi gil rek midek ak wök pag niṅek, yad niṅnek, usiṅ ar nib ain twelp tausan stadia amnak; pis kidadaṅ nib pis kidadaṅ twelp tausan stadia amnak. Pen kilan gil adip adip ak rek nep twelp tausan stadia amnak.^d ¹⁷Pen ejol nibak ne yir nibak dil, taun kib wari kis kis gak ak, bin bi yir lil wök pag nipal rek wök pagil, lim eyaṅ nib dai ar alaṅ wök pag niṅek, yad niṅnek, kiubit aknib ñin juil ar oṅid adik gi dam omal omal (144) amnak.^e ¹⁸Wari nibak, kab jasper apal ak dil gi lek midek. Taun kib ak, kab gol tep tep glas rek kid yib gilig gi mideb ak nep dil gi lek midek ak me, kid yib gilig gi midek. ¹⁹Kab par kib, kab wari kanim eyaṅ midek okok, kab tep tep mani kib tauap ke ke koṅai nep dil, kab par kib aknib umigan alaṅ nib okok gi lek midek. Dai nokim nib eyaṅ kab jasper ak gi lek midek; dai yigwu nab nib ak kab mik, sapaia ak gi lek midek; dai yigwu nokim nib ak kab komiṅ komiṅ sek, aget ak gi lek midek; dai yigwu par ak kab kikomiṅ sek, emral ak gi lek midek; ²⁰dai mamid alaṅ kab sapai abe tid abe ulik malik gi mideb, sadoniks ak gi lek midek; dai kagol oṅid ak kab sapai, kanilian ak gi lek midek; dai ar oṅid ak kab wihalin, krisolait ak gi lek midek; dai jil oṅid ak kab kikomiṅ sek, beril ak gi lek midek; dai ajip ak kab wihalin ke yib, topas ak gi lek midek; dai wajrem alaṅ ak kab kikomiṅ sek abe wihalin abe ulik malik gi mideb, krisopres ak gi lek midek; dai agip alaṅ ak kab sapai, aiasin ak gi lek midek; dai umigan alaṅ ak kab mik, ametis ak gi lek midek. ²¹Kanib tam kijon aknib umigan alaṅ okok, magil kolim kibap milep rek tid geb, “pöl” apal ak, kib ke yib aknib umigan alaṅ dil gi lek midek. Taun kib nibak, kanib okok kab gol tep tep glas rek kid gil mideb ak nep dil gi lek midek ak me, kid yib gil midek. ²²Pen taun kib nibak yad God sobok gep kariṅ alap ma niṅnek. God Bi Kib, Bi kilis ke yib ak abe, Sipsip N̄ilik ak abe midebir rek, God sobok gep kariṅ alap ma mideb; kiri apil mal God sobok gep kariṅ midebir. ²³Pen God melik tep ke yib ne mimelik gil, Sipsip N̄ilik lam melik gip rek ak mimelik gil gipir rek,

^d 21:16 Grik minim agil 12,000 stadia agak ak, 2,200 kilomita rek. ^e 21:17 Grik minim agil kiubit aknib ñin juil ar oṅid adik gi dam omal omal (144) agak ak, mita aknib ñin juil omal nokim adik gi dam mamid alaṅ (65) rek.

taun nib sijak pib takin wög alap ma mideb. ²⁴ Bin bi karip lim ke ke okok nib apil taun nibak am midenigal okok, melik tep nibak niñlig gi ajenigal. Kiñ lim dai wagin aul ke ke okok nib taun nibak am midenigal okok, tap tari tari tep, tap tari tari melik sek karip kiri gilak okok, sek dam taun kib ñilik miñan nibak am midenigal. ²⁵ Pen taun nibak, kijonj okok ma giññigal; kislím ma onigab niñil kijonj per per yikil nep midenigab. ²⁶ Bin bi karip lim ke ke okok nib apil taun nibak am midenigal okok, tap tari tari tep, tap tari tari melik sek karip kiri gilak okok, sek dam taun kib ñilik miñan nibak am midenigal. ²⁷ God nop asik mosik gip tap ak, taun ñilik miñan nibak amnimel rek ma linigab. Bin bi god esek sobok gil gi timel yib gipal okok, taun ñilik miñan nibak amnimel rek ma linigab. Bin bi per per nep komiñ midenigal mij nibak eyañ, Sipsip Ñilik yib kirop ñu kil tiknigab bin bi okok nep, taun ñilik miñan nibak amnigal.

Ñig Komiñ Magil Ñeb ak

22 ¹ Ejol nibak, ñig komiñ magil ñeb ak yip yomek niñnek. Ñig aposip nibak, glas mimelik gip rek mimelik gi aposip. Ñig nibak, God eip, Sipsip Ñilik ak eip, sea kiñ kiri apil mal bisigpir sijak alañ nib kilam juil, ² taun kib kaniñ nab sijak amil amnak. Ñig gol pis pis mab ñibil per per midenigal mab ak tanak. Mab ur nibak, mi nokim nokim takin ke ke umiñan alañ ak nep, per nep magil pileb. Pen mab kas nibak, bin bi karip lim ke ke okok nib kirop gek komiñ linimiñ rek nep mideb.

³ Taun kib nibak, God nop asik mosik gip tap ak ma mideb. God eip, Sipsip Ñilik ak eip, sea kiñ kiri apil mal ak taun kib nab sijak midenigab. God bin bi ne okok nop wög gi ñilig gi midenigal. ⁴ Taun kib nibak, God bin bi ne okok Sipsip Ñilik milik dai ne ak niññigal. Sipsip Ñilik yib ne ak aun beñ kiri alañ ñu kil tik lek midenigab. ⁵ Kislím ma onigab. God Bi Kib ak melik kirop ak midenigab ak me, sip milañ abe, pib abe wög alap ma midenigab. Kiri per nep per nep kiñ rek midenigal.

Mañ mideb Jisas onigab

⁶ Ne yip agil agak, “Minim nibaul minim niñid yib mideb; minim niñ dep nep mideb. Bi Kib, Kaun ne bi minim agep ne okok kirop gos ñek minim ne ageligipal God nibak nep, ejol ne ak ag yokek apil, mañ mideb ginigab minim ak ag ñosip,” agak.

⁷ “Pen niñim! Ulep mideb ninigain. Tap tari tari kisen ginig geb ak, buk nibaul mideb. Bin bi an an minim nibaul niñ dil, ageb rek ginigal okok, tep gek niñlig gi miñ miñ ginigal,” agak.

⁸ Yad Jon, ejol minim agosip ak abe, tap tari tari gosip ak abe magilsek niñnek. Pen ejol minim agosip ak abe, tap tari tari gosip ak abe magilsek niñ sakil, ap yap ejol nibak tob wagin ne sijak kogim yimil, nop sobok ginim, ag niñnek ak pen ⁹yip agak, “Mer! Yip nig ma ginimin; God nop nep

sobok ginimin. Nak God nop wög gi mideban ak, namam God minim agep bi okok abe, bin bi minim mideb buk nab nibaul ageb rek gipal okok abe, nibi God nop wög gipim rek, yad ak rek nep God nop wög gipin,” agak.

¹⁰Pen ejol nibak yip agak, “Kisen ginigab minim ñu kil tikpan piyak ak, tig mimoc gil okok ma we gi linimin; ulep mideb, minim ñu kil tikpan rek magilsek ginigab. ¹¹Nib ak niñil, bin bi gi timel gipal okok, kiri ak rek nep nag timel ar ak nep gilig gi midenimel; bin si bi si gipal okok, kiri ar nibak nep gilig gi midenimel; bin bi gi tep gipal okok, kiri ar tep nibak nep gilig gi midenimel; bin bi siñ midebal okok, kiri akniñ rek nep siñ midenimel,” agak. ¹²“Niñim! Ulep mideb ninigain. Minek nibak, nibi bin bi yad okok tari tari gipim ak niñil, pen ak rek nep tap tep ñinigain. ¹³Yad birarik ped okok midöligipin, kisen per nep per nep midenigain. Yad nep gen, tap okok magilsek wagin gil mideb. Yad nep gen, tap okok magilsek kir ginigab. Wagin ak yad nep, mibil ak yad nep midebin.

¹⁴“Bin bi walij kiri ñig li tep ginigal okok, miñ miñ ginigal. Mab magil ñibil per per midenigal ak ñen, kiri ñibil am taun kib ñilik migan nibak amñigal. ¹⁵Pen kain sapeb okok, taun nibak amnimel rek ma lip. Bin bi kij wanam gipal okok, bin si bi si gipal okok, cip ñapal okok, tap yokop okok god cin agil sobok gipal okok, minim esek apal okok, kiri mis eyañ nep midenigal.

¹⁶“Yad Jisas, ejol yad ak ag yoken, amil nibep bin bi yad cöc karip lim ke ke okok midebim okok, nibep minim yad nibaul ag ñib. Yad me, Depid tikek, tikel tik dam dapil gel, Bi Kib midenigab aglak ak nep, yad midebin. Yad me, gap poglin kib karip tikniñ gek niñlig gi ap raneb, apal ak yad nep midebin,” agak.

¹⁷God Kaun ak abe, Bin Bi dinigab Bin nibak abe, kiri mal “Owan e!” agebir.

Bin bi minim nib aul niñenigal okok ak rek nep, “Owan e!” agnimel.

Nibi bin bi ñig nen gip okok magilsek owim! Apil, ñig komiñ magil ñeb ak yokop dil niñim.

¹⁸Bin bi minim buk nibaul mideb uñin li niñil agel, nibi niñnigabim bin bi okok, tap tari tari kisen ginimiñ minim ak niñ tep ginimiñ. Bin bi ognap minim nib aul niñil, minim ognap sek yigog magog genigal ak, God kirop pen yur ñil gek, miñer kib buk nibaul ageb rek sek dinigal. ¹⁹Pen bin bi an an minim nib aul dai ognap ma din agil kirig genigal ak, God kirop pen mab magil ñibil per per midenigal agip ak mer agek ma niñnigal; Taun Kib Siñ ak am midenigal agip ak abe mer agek ma amñigal.

²⁰Bi minim ñu kil tikpin Bi ak ageb, “Yau! Ulep mideb ninigain,” ageb.

Nib akniñ rek tep! Bi Kib Jisas, nak owan e!

²¹Bi Kib cin Jisas nibep God bin bi ne yimig gek kod mid tep gilig gi midonimiñ. Nib akniñ rek tep.